



МАРҲАБО



*Афломуннинг
хотини*



ТОШКЕНТ – «O'ZBEKISTON» – 2015

УЎК: 821.512.133-1

КБК 84(5Ў)7

M 29

ISBN 978-9943-28-307-7

© Марҳабо, 2015

© «O'zbekiston» НМИУ, 2015

ВАТАН ҲАҚИДА СҮЗ

Сўритокларда узум, новдаси қулоч-қулоч,
Айвонида ҳар баҳор бола очар қалдирғоч,
Салом бериб кирса ким, тўйиб чиқар бўлса оч,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.

Кампирларин қўлида куйлайди урчуғиям,
Боламга, деб дон чўқир, каптар, чугурчуғиям,
Ўғил кўрса, тўй қилас, ҳаттоқи, чумчуғиям,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.

Янги пишган анжирин илинар қўшнисига,
«Нон ёпинг», деб тандирин илинар қўшнисига,
Уч кун уйда бўлмаса, билинар қўшнисига,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.

Яшаб юриши мумкин қўл, оёғу бармоқсиз,
Аммо яшай олмайди эл-юрт, уруғ-аймоқсиз,
Кузатишмас меҳмонни новвот, майиз, қаймоқсиз,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.

Тўй қилиб, эл-юртига едириб, мазза қилар,
Кетаётганда, чопон кийдириб, мазза қилар,
Бу маззани лондонлик бой ота қайдан билар,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.

Қандай яшаб бўлади ҳандалаксиз, қовунсиз,
Эркак эркак бўптими улоқ, кураш ўйинсиз,
Бусиз ҳам элман, деган сафсатани қўйинг сиз,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.

Азиз қилар қайси эл биздай ота-онани,
Ён қўшниси тўй қилса, чиқмаган ҳам одамми,
Тўкис бўлмас ўзбексиз инсоният олами,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.

Бешик майли, тувагин кўриб лол бўлганлар бор,
Минг йил олдин ҳам бу эл эди буюк ижодкор,
Фарзандларин қонида яшар ўша иқтидор,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.

Юрт айланиб кузатсанг, бозори йўқ баққолсиз,
Юришмайди чоллари, дўппи, яхтак, соқолсиз,
Тилин учида ҳазил, гап гапирмас мақолсиз,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.

Балки шу эл қўксига туриб ой сочар зиё,
Шундай яшаш керакдир аслида бутун дунё,
Бу элатни бошқача қилиб бўлмас, Марҳабо,
Билолмадим, Фарангу Африқода қанақа,
Дунё ҳайрон бўлса ҳам, ўзбекларда шунақа.



КАТТАЛАРГА НАСИҲАТ

Ярақлаган уйларинг чанг бўлсаям, сиқилма,
Рўзгорингда бир нима кам бўлсаям, сиқилма,
Ташвишлардан кунда бир жанг бўлсаям,
сиқилма,
Ўғлинг еб, ўрга кетар, қизинг еб, қирга.

Чайнаётган нонингни «боламга», деб ўласан,
Катта бўлгач, гап билан бир силтаса, сўласан,
Бино қўйма, сийлама, пўпалама, кўрасан,
Ўғлинг еб, ўрга кетар, қизинг еб, қирга.

Қариганда ғалвани кўтаролмас юрагинг,
Қани ота-оналар – суюнчиғинг, тиргагинг?
Ётиб қолсанг, оғрисанг, кимга бўлар керагинг?
Ўғлинг еб, ўрга кетар, қизинг еб, қирга.

Фамни олсанг қўнгилга, тўлиб кетаверасан,
Офтоб урган майсадай, сўлиб кетаверасан,
Юрагингни чанглаб, ўлиб кетаверасан,
Ўғлинг еб, ўрга кетар, қизинг еб, қирга.

Ўзин боққанинг қолиб, боласин ҳам боқасан,
Куч-куватинг борида ҳаммасига ёқасан,
Ўзинг учун бир бора чиққанмисан боқقا, сан?
Ўғлинг еб, ўрга кетар, қизинг еб, қирга.

Үйлантиру болангни, бўлак қилгин уйини,
Ўзи тортсин рўзгорнинг ташвишини, ўйини,
Қўриб турсанг бўлгани, соғ-саломат бўйини,
Ўғлинг еб, ўрга кетар, қизинг еб, қирга.

Таъма қилсанг бир нонни, чимирилар қошлари,
Сенсиз пишиб ейилар, ёғлиққина ошлари,
Югуришар олдингга, оғриб қолса бошлари,
Ўғлинг еб, ўрга кетар, қизинг еб, қирга.

Эрининг топганини ўйнаб, еркан бир аёл,
Ўғлининг топганини, ўйлаб, еркан бир аёл,
Бекорга айтилмаган, халқ ичидা бу мақол,
Ўғлинг еб, ўрга кетар, қизинг еб, қирга.

Майли, тушган уйида яшнаб юрсин келинлар,
Мақтаб, алқаб, дуо қил, яйраб юрсин келинлар,
Қайнонаммас, онам, деб, сайраб юрсин келинлар,
Ўғлинг еб, ўрга кетар, қизинг еб, қирга.

Ялаб-юлқиган уйинг, келинларга қолодир,
Сендан кейин ким билар, не куйларга солодир,
Уйим, болам, чақам деб, олаверма хавотир,
Ўғлинг еб, ўрга кетар, қизинг еб, қирга.

Меҳнат қилдинг тинмадинг, етганича имконинг,
Ўзинг учун ҳам яша, ғаниматдур ҳар онинг,
Тоғларга чиқ, ҳаво ют, жон-жон ўзингни жонинг,
Ўғлинг еб, ўрга кетар, қизинг еб, қирга.

Ўғилларда қўш улов, сен юрасан пиёда,
Ўзларидан ошмайди, моли бўлса зиёда,
Болам, болам, болам деб, нима қўрдинг дунёда?
Ўғлинг еб, ўрга кетар, қизинг еб, қирга.

Ўлсанг болаларинг ҳам қабргача боради,
Айт-чи, унда сен билан қайси бири қолади,
Қиёматда қай бири гуноҳингни олади?
Ўғлинг еб, ўрга кетар, қизинг еб, қирга.

Кўнглинг кимни хушласа, ўша билан суҳбат қил,
Тиконларга қарама, гулга қараб роҳат қил,
Асабингни қийнама, юрагингга шафқат қил,
Ўғлинг еб, ўрга кетар, қизинг еб, қирга.

Жуфтинг учун ясаниб, эй аёл, ҳеч толмагин,
Қариликни бўйнингга асло-асло олмагин,
Ўнта боланг бўлса ҳам, эргинангдан қолмагин
Ўғлинг еб, ўрга кетар, қизинг еб, қирга.

Кунлар келар инжиқ чол, бирор келмас ёнингга,
Шу илмилиқ кампикинг оро кирап жонингга,
Шукр қил бирга ўтган ҳар соат, ҳар онингга,
Ўғлинг еб, ўрга кетар, қизинг еб, қирга.

Тўрт пул топсанг ярмини кексаликка олиб қўй,
Йифиб, эски нимчангнинг чўнтағига солиб қўй,
Ўн бола бир отани боқолмайди, билиб қўй,
Ўғлинг еб, ўрга кетар, қизинг еб, қирга.

Кўлинг ишда ва лекин Роббанода бўлсин дил,
Фийбат, ҳасрат гапни қўй, субҳоноллоҳ
айтсин тил,
Бу дунёнинг нонин еб, у дунёнинг ишин қил,
Ўғлинг еб, ўрга кетар, қизинг еб, қирга.

Йиғишириб умрнинг қолганини – борини,
Эй, Марҳабо, қилгайсан охиратнинг корини,
Қулофингга қуиб ол бу насиҳат – дорини,
Ўғлинг еб, ўрга кетар, қизинг еб, қирга.



БИРОВНИНГ БОЛАСИ УЙИМДА

Тўй қилиб, келинчак туширдим,
Ўзимга ўзим иш оширдим,
Ман энди... ман энди тушундим,
Биронинг боласи уйимда.

Бақирманг, дадаси, секин-ей,
Овозингиз бирам текин-ей,
Уйимнинг қайтига бекинай,
Биронинг боласи уйимда.

Ҳаммага қиласман илтифот,
Тилимга бўласман эҳтиёт,
Кўчага чиқмасин «ахборот»,
Биронинг боласи уйимда.

Келинлик бир келар, яйрасин,
Аллоҳим илтифот айласин,
Қозоним гўшт билан қайнасин,
Биронинг боласи уйимда.

Сипороқ кийингин,вой, қизим,
Ибрат бўл келинга, ҳой, қизим,
Онангни тушунгин, ой қизим,
Биронинг боласи уйимда.

Ёрдам қил, сиқиб бер ўсмасин,
Бахтингни йўлини тўсмасин,
Совчига ёмонлаб қўймасин,
Бироннинг боласи уйимда.

Чимирилмасин деб қошлари,
Авайлаб шу келин пошшани,
«Сиз-сиз»лаб ҳайдайман пашшани
Бироннинг боласи уйимда.

Койишар: «Эркалаб, куласан,
Келинга «майли» деб турасан...»
Бошингта тушганда биласан,
Бироннинг боласи уйимда.

Нонини куйдирса, майлига,
Идишни синдирса, майлига,
«Адвокат»ман ўша Лайлига,
Бироннинг боласи уйимда.

Болам дер, гапирсам: «Уф, бўпти»,
Билмадим, балки «куф-суф» бўпти,
Ўғлим ҳам қўшилиб, жуфт бўпти,
Бироннинг боласи уйимда.

Майли, мен – қайнона, қайнамай,
Келин ҳам тек юрсин, айнамай,
Бу ҳам бир кўргилик, айланай,
Бироннинг боласи уйимда.

Меҳр-ла кўнгиллар бойланар,
Қаҳр-ла юраклар лойланар,
Бир кун ўз боламга айланар,
Бироннинг боласи уйимда.

Марҳабо дер: ичим кон, дўстлар,
Учрашиб турайлик, жон дўстлар,
Ҳасратдан юрагим қон, дўстлар,
Бироннинг боласи уйимда.



ЎФИЛ БОЛАНГ – БИРОВНИНГ ХАСМИ

Ўғилми қиз – бари ўз боланг,
Қизлар – меҳмон, дейишар расми,
Ўзингники асли – қиз боланг,
Ўғил боланг – бироннинг хасми.

Ўстирасан бўлиб парвона,
Эга чиқар битта жонона,
Бу савдога бўлма ҳайрона,
Ўғил боланг – бироннинг хасми.

Унутса ҳам ўз онасини,
Туғилган ҳовли – хонасини,
Унутмайди қайнонасини,
Ўғил боланг – бироннинг хасми.

Қизинг жонин илиниб турар
Юраклари тилиниб турар,
Мехри кўздан билиниб турар,
Ўғил боланг – бироннинг хасми.

Софинганда йифламай кутгин,
Ичикмасдан ўзингни тутгин,
Кўз ёшингни «қулт» этиб ютгин,
Ўғил боланг – бироннинг хасми.

Уй-рўзгори бўйнида хуржун,
Боламга дер, Худо берган кун,
Дуо қилу, чиқармагин ун,
Ўғил боланг – бироннинг хасми.

Юрагининг устуни – ёри,
Совуққотса пўстини – ёри,
Боласига топгани, бори,
Ўғил боланг – бироннинг хасми.

Уришсалар қози бўласан,
Ўртада тарози бўласан,
Ўлимингта рози бўласан,
Ўғил боланг – бироннинг хасми.

Иши тушса ёнингта чопар,
Ҳиндистонда бўлсанг ҳам топар,
Бошқа пайт кутмагин эй, модар,
Ўғил боланг – бироннинг хасми.

Хафа бўлсанг койиб, тонасан,
Кечирасан, чунки онасан,
Тушун, мунча куйиб – ёнасан,
Ўғил боланг – бироннинг хасми.

Жанжал қилма, онамисан, бас!
Келин сенинг кундошинг эмас,
Ўғлинг энди сирдошинг эмас,
Ўғил боланг – бировнинг хасми.

Совчиликка боришдан олдин,
Сандиққа сеп солишдан олдин,
Бир мантиққа кўнишиб олгин,
Ўғил боланг – бировнинг хасми.

Келса-ю келмаса, дуо қил,
Билса-ю билмаса, дуо қил,
Берса-ю бермаса, дуо қил,
Ўғил боланг – бировнинг хасми.

Меҳнатларинг – Худо йўлига,
Заҳматларинг – Худо йўлига,
Қаратиб қўймасин қўлига,
Ўғил боланг – бировнинг хасми.

Келинга гапирсанг мулойим,
Ўғлинг сендан рози ҳар доим,
Бу ҳаётдир, Марҳабо ойим,
Ўғил боланг – бировнинг хасми.

ҚИЗИМ, ҚАЙНОНАНГ – ТИЛЛО

Қизгинамни узатдим,
Үз уйига кузатдим,
Кетарда бир сўз айтдим:
Қизим, қайнонанг – тилло.

Аразлаб келар қизим,
Жовдираб турар кўзим,
Безиллаб туриб ўзим,
Дедим: Қайнонанг – тилло.

Дер: «Қайнонам тили ўқ,
Койиб, нолиб, ураг дўқ,
Кўнгил билан иши йўқ...»
Дедим: Қайнонанг – тилло.

– Кечирмас, бурни осмон,
Эрим яхши, у – ёмон.
– Бекор айтибсан, нодон,
Дедим: – Қайнонанг – тилло.

Икки қўлдан чиқар қарс,
Мулойим бўл, келгин паст,
«Хўп бўлади», десанг бас,
Қизим, қайнонанг – тилло.

Арз қилиб келгандаям,
Ҳар нима дегандаям,
Қизим ҳақ бўлгандаям,
Дедим: Қайнонанг – тилло.

Кутиб олиб ўзини,
Бошламасдан сўзини,
Бекитаман оғзини:
Қизим, қайнонанг – тилло.

Қайтиб келса, «бор», – дедим,
«Сенга уйим тор», – дедим,
«Пешона – бозор», – дедим,
Дедим: Қайнонанг – тилло».

Қизгинамни аврайман,
Телефондаям сайрайман,
Уйқумдаям жаврайман:
Қизим, қайнонанг – тилло.

Чархни бузган-парраси,
Қизни бузган-онаси,
Бузмай ўлсин онаси!
Қизим, қайнонанг – тилло.

Уйини-уй бўлсин деб,
Айрилмоқни кўрмай эп,
Битта билан ўтсин, деб,
Дедим: Қайнонанг — тилло.

Қиз узатиб тўйлабман,
Кутулдим, деб ўйлабман,
Бекорларни сўйлабман,
Қизим, қайнонанг — тилло.

Қизингмидур ўғлингдур
Бари юрак қўрингдур,
Тинчимаса — шўрингдур,
Қизим, қайнонанг — тилло.

Марҳабохон йифлаб дер:
Юрагим қони — бу шеър,
«Тиллохон»га инсоф бер,
Қизим, қайнонанг — тилло.

Тугамайди фавоси,
Адо қилди савдоси,
Қиз туққаннинг жазоси,
«Қизим, қайнонанг — тилло».

КУЁВИМГА ИЛТИЖО

(Қизим аразлаб келганда)

Куёв болам – ўз болам,
Менинг қора кўз болам,
Тилимда бир сўз, болам,
Қизим – ёмон, сиз – яхши.

Эрка болам, арслоним,
Ойим турган осмоним,
Қўлингиздадир жоним.
Қизим – ёмон, сиз – яхши.

Йигит борми сиздай мард,
Юраги тоза, бегард,
Икки дунё кўрманг дард
Қизим – ёмон, сиз – яхши.

Биз – темир, сиз – тиллосиз,
Биз – оми, сиз – муллосиз,
Биз – нодон, сиз – доносиз,
Қизим – ёмон, сиз – яхши.

Қизимнинг ўзи аҳмоқ,
Юради сизни мақтаб,
Бир кепти-да аразлаб,
Қизим – ёмон, сиз – яхши.

Тириклик деб юрсангиз,
Үй-жойим деб турсангиз,
Нима қипти урсангиз,
Қизим – ёмон, сиз – яхши.

Рўзгор хуржун бўлади,
Гоҳ камиб, гоҳ тўлади,
Хотин деган кўнади.
Қизим – ёмон, сиз – яхши.

Болам, сизда ихтиёр,
Бўлмайлик озор-безор,
Ўргада болалар бор,
Қизим – ёмон, сиз – яхши.

Кўп яшанг, юзга етинг,
Қиз тушгурни афв этинг,
Алдаб-сулдаб обкетинг,
Қизим – ёмон, сиз – яхши.

Ишламай ётсангиз ҳам,
Маст бўлиб қотсангиз ҳам,
Чойнакни отсангиз ҳам,
Қизим – ёмон, сиз – яхши.

Бўлсангиз ҳам майдагап,
Юрсангиз ҳам ўнгу чап,
Мен ҳамиша сиз тараф,
Қизим – ёмон, сиз – яхши.

Соғлигидა – сизники,
Ўғлиники, қизники,
Касал бўлса – бизники,
Қизим – ёмон, сиз – яхши.

Тақсиримсиз, хўжамсиз,
Қимматбаҳо ўлжамсиз,
Ўзим очган жўжамсиз,
Қизим – ёмон, сиз – яхши.

Марҳабоҳон, уққаним
Гўнгга фунча суққаним,
Гуноҳим – қиз туққаним,
Қизим – ёмон, сиз – яхши.



МУРОСАСИЗ КЕЛИНЛАРДАН ДОД!

Онам ўлса «дод!» демаганман,
Эрим урса «дод!» демаганман,
Бир савдодан куйди жону тан,
Муросасиз келинлардан дод!

Нима экан билмадим сири,
Оляяди бирига-бири,
Хеч бўлмаса дўст эмас тили,
Муросасиз келинлардан дод!

Чимирилиб тургани қайси,
Қовоқ солиб юргани қайси,
Боласини ургани қайси,
Муросасиз келинлардан дод!

Бир-бирини силталаган чоғ,
Юрагимга санчилар пичоқ,
Ўфилларим бўлишди тарқоқ,
Муросасиз келинлардан дод!

Кўнглим тинмас бир ерга чиқиб,
Бири бирин олса-я чўқиб,
Яшаяпман безиллаб, қўрқиб,
Муросасиз келинлардан дод!

Қанотимни қайирвориши,
Жигарларни айирвориши,
Обрўйимни лойга қориши,
Муросасиз келинлардан дод!

Талашасан нимани, нодон?!
Пойингда ер, бошингда осмон,
Бу дунёга ҳаммамиз меҳмон,
Муросасиз келинлардан дод!

Ўтмиш бўлса нима дер эди?
Тўрт хотинга битта эр эди,
Ўшалар ҳам «шукр», дер эди,
Муросасиз келинлардан дод!

Аста одам бўлишармикин?
Чирой очиб кўришармикин?
Аҳил бўлса, ўлишармикин?!
Муросасиз келинлардан дод!

Бошқа уйим бўлганда, ё Раб,
Шулар билан юрмасдим яшаб,
Кетар эдим шу уйни ташлаб,
Муросасиз келинлардан дод!

Ерга қамиш, бўйрами тўшаб,
Аталами, умочми ошаб,
Чолим билан юрадим яшаб,
Муросасиз келинлардан дод!

Оёғимни – ўғил қилволсам,
Қўлларимни – келин қилволсам,
Қиласр эди не ишга солсам,
Муросасиз келинлардан дод!

Доно келин элтузар – зиё,
Нодон келин юртбузар – бало,
Шуларга ҳам инсоф бер, Худо,
Муросасиз келинлардан дод!

Безор бўлдим қовоқ-қошидан,
Кечдим қилган нону ошидан,
Хизматиям қолсин бошидан,
Муросасиз келинлардан дод!

Марҳабохон, боқмай ёшимга,
Ўлим келса кўққис бошимга,
Ёзиб қўйинг қабр тошимга:
«Муросасиз келинлардан дод!»

«АСАЛ ОЙИ»

Чет элда тўйдан кейин,
Ёшлар тарқ этиб уйин,
Бир ой саёҳат, уйин
«Асал ойи» бошланар.

Бизнинг уйда бошқача,
«Асал ойи» – бир кеча,
Сўнг ҳар тонг супур кўча,
«Саҳар ойи» бошланар.

Бечора келин-куёв,
Тунда учрашар бир ров,
Сўнг кўнгил айниб дарров,
«Ташар ойи» бошланар.

Бўлишар ота-она,
Олти йилда тўрт бола,
Мактабга-ю, боғчага,
«Чопар ойи» бошланар.

Керак кўп пул топиши,
Уй, қуриб, том ёпиши,
Камлик қилиб, чопиши,
«Учар ойи» бошланар

Қиз етилгач узатиб,
Зеб-зийнат-ла кузатиб,
Сандигларни бўшатиб,
«Сочар ойи» бошланар.

Келин чиқса беадаб,
Кўчага ташийди гап,
Хонадон сирин боплаб,
«Очар ойи» бошланар.

Билгунча ўнгу чапни,
Тушунтиrolмай гапни,
Йифлаб-сиқтаб асабни,
«Бузар ойи» бошланар.

У болангда у ғалва,
Бу болангда, бу ғалва,
Тинч ўтириш қаёқда?
«Заҳар ойи» бошланар.

Ўғил-қизнинг савдоси,
Битмас экан ғавфоси,
Кетга тегиб навдоси,
«Касал ойи» бошланар.

Уйлаб-жойлаб, «қутилиб»,
Ташвишларга тутилиб,
Соч оқариб, ҳол қуриб,
«Яшар ойи» бошланар.

Ўзий-чун шўрлик банда,
Яшашни бошлагандা,
Охират диёрига,
«Сафар ойи» бошланар.

Бу бир эски ақида,
Бундай яшамоқ хато,
Ҳаётнинг ҳар онини,
Эҳтиёт қил, Марҳабо.

Бериб қўйма юракни,
Ташвишларнинг қўлига,
Ўғил-қиз ҳам, жигар ҳам,
Ҳаммаси ўз йўлига.

Тақдирнинг ҳеч ишини
Қолипга сололмайсан,
Аллоҳнинг дунёсини,
Сен бошқара олмайсан.

«Нега ундей, бундай?» деб,
Қилаверма ташвиш, ўй,
Эплай олмаяпсанми,
Ўз ҳолига ташлаб қўй.

Тафаккур эт, фикр эту,
Охират ғамини қил.
Буям битта рўзфоринг,
Неси йўқ, камини қил.

Шукру тавозеъ ила,
Уриб турса ҳар юрак,
Ҳаётнинг ҳар лаҳзаси,
Асал бўлиши керак.



ҚУТУЛАСАН

— Болалардан қутулғанмисиз?
— Алҳамдуиллаҳ, қутулғанман.
Сүҳбатдан.

Үғил уйладинг алҳол,
Қиз узатдинг йифиб мол,
Нафасингни қаттиқ ол,
Кутиласан-а, қутуласан!

Энди «чаллар»-чақириқ,
Ҳар шаҳарда ҳар қилиқ,
Мол кетар сандиқ-сандиқ,
Кутиласан-а, қутуласан!

Шу билан битсайди иш,
Ҳам қувончу ҳам ташвиш,
Керак суннат тўй қилиш,
Кутиласан-а, қутуласан!

Суннат бўлган ёш бола,
Ясанар ота-она,
Кўтар қарзи ҳасана,
Кутиласан-а, қутуласан!

Гоҳ қиз келар тумтайиб,
Икки ёқقا гап чайиб,
Ўзи оппоқ-беайб,
Кутиласан-а, қутуласан!

Қўлида бир боласи,
Қорнида бир боласи,
Ёмонмиш қайнонаси,
Кутиласан-а, қутуласан!

Гоҳ шўхлик қилар куёв,
Гапи келади дарров,
Бари жонингга эгов,
Кутиласан-а, қутуласан!

Келин бошласа ғалва,
Бу кўрганларинг — ҳолва,
Астағфируллоҳ, тавба!
Кутиласан-а, қутуласан!

Қўлин қўйиб белига,
Сапчиб турса эрига,
Ботиб ғазаб терига,
Кутиласан-а, қутуласан!

Ўғлинг бошлайди: «Эсиз,
Кўп эди дунёда қиз,
Шуни ўзиз топгансиз»,
Кутиласан-а, қутуласан!

Туғиб қўйганинг учун,
Боқиб қўйганинг учун,
Сендан олишар ўчин,
Кутиласан-а, қутуласан!

Ҳар кун — баҳор, ёзу қиши,
Чиқиб тураг бир ташвиш,
Бу не ҳаёт, бу не иш?
Кутиласан-а, қутуласан!

Боланг пули халтада,
Сенинг пулинг ўртада,
Буям янгича мода,
Кутиласан-а, қутуласан!

Эркагу хотин яна,
Ҳайдашади машина,
Омон келармикин-а?
Кутиласан-а, қутуласан!

Эшикка қараб зир-зир,
На ош ва на нон татир,
Ичинг тўла хавотир,
Кутиласан-а, қутуласан!

Кўчадаги мой ютар,
Уйдагилар қон ютар,
Бу кунлар қачон ўтар?
Кутиласан-а, қутуласан!

Ота-она токи бор,
Болага қул, хизматкор,
Бошқа изоҳ не даркор?!
Кутиласан-а, қутуласан!

Эй, Марҳабо, бечора,
Сўраб қолишса яна:
«Кутулганман», дейсан-а,
Кутуласан-а, қутуласан!

Уйлаб-жойлаб меҳнатнинг
Зўрроғига тутиласан.
Кутиласан-а, қутуласан!

ҚУДА БҮЛДИК...

Яшар эдик бўлиб ўртоқ,
Бир-бировга очиб қучоқ,
Ўтсиз қолди энди ўчоқ
Куда бўлдик — жудо бўлдик.

Ёқалашдик ёшларни деб,
Шу икки бебошларни деб,
Биров еган ошларни деб,
Куда бўлдик — жудо бўлдик.

Ака-ука, опа-сингил,
Гаплашардик гангир-гунгир,
Аразлашдик, қолди кўнгил,
Куда бўлдик — жудо бўлдик.

Қариндошлар тараф-тараф,
Жовдирашар бизга қараб,
Гурунглашолмаймиз яйраб,
Куда бўлдик — жудо бўлдик.

Қўшним эди жонажоним,
Битта эди дастурхоним,
Қўшилганда энди қоним,
Куда бўлдик — жудо бўлдик.

Яхшийди-я ниятимиз,
Чиқиб қолди иллатимиз,
Эсизгина меҳнатимиз,
Куда бўлдик — жудо бўлдик.

Қарамадик ўнгу чапга,
Қулоқ солдик майда гапга,
Ҳасрат қылдик чор тарафга,
Куда бўлдик — жудо бўлдик.

Фарзандлар-ку яшар бирга,
Ёмон бўлди фақат бизга,
Кўрпа куйди, тирик бурга,
Куда бўлдик — жудо бўлдик.

Эслаб ёмон сўзимни мен,
Уришаман ўзимни мен,
Энди очдим кўзимни мен,
Куда бўлдик — жудо бўлдик.

Миннатли ош тузим курсин!
Андишасиз юзим курсин!
Шу чақимчи қизим курсин!
Куда бўлдик — жудо бўлдик.

Огоҳ этай энди сизни,
Бегонага беринг қизни,
Нима жинлар урди бизни,
Куда бўлдик — жудо бўлдик.

Марҳабохон, бу дунё кенг,
Кимки тўйга шимарса енг,
«Таваккалту ал-Аллоҳ», денг,
Куда бўлдик — жудо бўлдик.



СЕЗГИР ОНА

Ўғил деди онага:
— Кўрсатаман икки қиз,
Қайси менга ёқишин,
Билиб олинг ўзингиз.

Бири пушти кўйлакда,
Бирининг кўйлаги оқ,
Иккисиям чиройли,
Гўзалликда — қўғирчоқ.

Биттасини қўрганда,
Кўнглим нурга тўлади.
Топволинг-чи, қай бири
Сизга келин бўлади?

Она кўнгли сезаркан,
Топди ўғли суйганин,
Деди: — Менинг келиним —
Пушти кўйлак кийгани.

Ўғил деди: — Офарин!
Топдингиз-а, онажон,
Қойил қолдим, хушёrsиз,
Адашмайсиз ҳеч қачон.

Энди айтинг, қоши ё,
Кўзидан сездингиз? – Йўқ.
– Туриши, юриши ё,
Сўзидан сездингиз? – Йўқ.

– Бўлмаса қандай қилиб,
Юрагингиз сезяпти?
– Билмадиму, шу қизни
Кўрсам, ғашим келяпти.



ТАСАЛЛИ

Менинг эрим «юриб» кетди,
Юрак-бағрим қуйиб кетди,
Үзим билсам гўрга эди,
Бу овоза бўлиб кетди.

Кеч келади ишидан ҳам,
Айрилгандай хушидан ҳам,
«Юрган»ини билса бўлар,
Кўраётган тушидан ҳам.

Рўзгор, бола менга қолиб,
Ўтиради ўйга толиб,
Телефони жирингласа,
Гаплашади бекинволиб.

Ҳар нодон дер: «Фолбинга бор,
«Иссик-совуқ», сеҳр бергин».
Бирон доно айтмайдики,
«Эрингни сев, меҳр бергин».

Болаларим билишмасин,
Кўз ёшимни кўришмасин,
Кўнгли қолиб, отасини
Ёмон кўриб қолишмасин.

Қайнар фийбат: «Ия-ия!
Эриз уйланвоганмиш-а?!»
Ёнин олиб уришаман:
«Ажаб қипти, сизга нима?!»

Опам бошлар мени кўрса:
— Хотинбозмиш эринг роса,
— Нима қилсин, «хотин»лариз,
Ўзлари икибоз бўлса?

— Вой, сен — аҳмоқ, вой, сен — беор!
Сенга керак бўлмаса ёр,
Сот, ким ошди савдосида,
Маҳаллангта очиб бозор.

Поччангни кўр, қандай эркак!
Чакки юрмас, тоза юрак!
— Менинг эрим зўр-да, сизи
Латта эриз кимга керак?!

— Вой, зўр бўлган эринг курсин!
Бино қўйган шеринг курсин!
Сенга жоним куйдими-я,
Юрмағидан ортиқ юрсин!

Қизғонмайдиям, ҳе, сани,
Ортиқ яна керилгани!
— Нимасини қизғонаман,
Пойабзалми йийилгани?!

Қўйманг бизни уриштириб,
Юрсам тергаб, суриштириб,
Бир чиройли оиласми
Бузайми эр қувуштириб?

Юраману, бермай сирим,
Аммо ғамдан оғрир дилим,
Кундошли хотинлар бекор,
Чекишмаган экан чилим.

Ким у жонон, билгим келар,
Афтини бир кўргим келар,
Тугиб олиб соchlарини,
Битта-битта юлгим келар.

Боргим келмас меҳмонгаям,
Боққим келмас инсонгаям,
Жанжал қил, деб гиж-гижлайди
Иш топилди шайтонгаям.

— Етиб бор, — дер, ўша ерга
Иккалови ҳозир бирга.
— Бормайман-е, жинниманми,
Фуруримни уриб ерга?!

Нима фойда уришлардан,
Қозилашиб юришлардан?!
Үқ отайин кундошимга,
Мағрур қараб туришлардан.

Эр күнгли — қуш, учиб кетар,
Совуқ юртдан кўчиб кетар,
Тутмоқ учун дон сепайин,
Милтиқ отсам, қочиб кетар.

Ранжимасин эрим, майли,
Зўр аёл эр талашмайди,
Боплаб қўяр эдимку-я,
Бу иш менга ярашмайди.

Нодонга донолик қиласай,
Саҳрога дарёлик қиласай,
Номард қилса бегоналик,
Мен унга ошнолик қиласай.

Жилсин десам тош жойидан,
Бўлай эримнинг пойидан,
Куёш бўлиб меҳрим сочиб,
Айнитай ўша ойидан.

Пардозлаб юз, қошу кўзни,
Қувноқликка солиб ўзни,
Ҳар тонг қараб тошойнага,
Такрорлайман битта сўзни:

Минг турлансин ўша Лайли,
Марҳабога ўхшолмайди!
Кийган билан ковушимни,
Қилолмайди юришимни!



«ТАДБИРКОР» АЁЛ

Яхши одам, зўр одам,
Болаларим дадаси,
Аммо мени куйдирган,
Шу одамнинг зардаси.

Арзимаган нарсага,
Феъли келиб қолади,
Қўлига нима кирса,
Ўша билан солади.

Авлоду аждодимни
Бирма-бир «ўқиб» чиқар,
Болаларният ҳатто,
Эринмай сўкиб чиқар.

Мен – айбдор, мен – ёмон,
Ўзи – оппоқ, гулдаста,
Шунча йиллик хотинин
Лойга булар бир пасда.

Кўяр зумда дунёни,
Falva билан тўлдириб,
Аламимдан шу тобда,
Кўйгим келар ўлдириб.

Аммо «фиринг» демасдан,
Пасайишин кутаман,
Олишсам ёмон бўлар,
Индамасам — ютаман.

Баъзан юрар ё кўзим,
Ё пешонам кўкариб,
Жаҳли кетгач «кечир» дер,
Кўлларини кўтариб.

Опам жаврар эшитиб:
— Инсоф билан туртиб, ур,
Битта гапга шунчалик,
Қиладими, ер ютгур!.

Эрга қирон келганми?!
Айрилади, кетади,
Онам айтар: — Ўлсаям,
Битта билан ўтади!

Сабр қилмай ёмонга,
Яхшисига қочасан,
Кўйиб берса сенларга,
Эр бозори очасан.

Опам дер: — Гулдай аёл,
Сўлиб кетса майлими?
Шу золимнинг қўлида,
Ўлиб кетса майлими?

— Эру хотин уриши —
Дока рўмол қуриши!
Ўзгармади ҳеч эrim,
Ўша-ўша туриши.

Бир кун яна уришди,
Ёқмай пиширган ошим,
Лаган билан бир солди,
Ёрилай деди бошим.

Йигирма йил яшадим,
Чидаб калтакларига,
Жондан ўтди бу сафар,
Кўл силтадим барига.

Қарор қилдим: — Кетаман!
Хувилласин хонаси,
Эrim деди: — Кетмагин,
Пул бераман, онаси.

Пул дарагин эшитиб,
Қизим тушди ёдимга,
«Кўйлак олиб беринг», деб,
Тегётганди жонимга.

Шу тоб бирдан жим бўлдим,
Урушдим на талашдим,
Қизгинамга кўйлак деб,
Эрим билан ярашдим.

Қизим кўйлагин кўриб,
Пўнфиллади ўғлим сал:
«Эсизгина, менгаям
Керак эди пойабзал».

Дедим: «Сабр қил, болам,
Ҳали бой бўб қоламиз,
Яна бир калтак есам,
Сенга туфли оламиз».

Кутар эдим яна бир
Кўтаришин қўлини,
Ахир энди топгандим,
Пул ишлашнинг йўлини.

Айтардим бир камимни,
Кўпайтириб тўрттага,
Баъзан гаплариниям,
Қайтардим жўртага.

Уришдан ҳеч дарак йўқ,
Синмади қўл, белим ҳам,
Пули кетиб, инсофга
Кеб қолипти эrim ҳам.

Туртимайди, сўкмайди,
Нима жинлар урипти?
Ўғлим ҳалиям эски
Туфлисида юрипти.

Гулда ё, пулда бўлса,
Ажаб, эркак хаёли,
Ўларда ҳам «болам» дер,
Ўзбекларнинг аёли.



НАВОИЙГА ҚЎШНИ БЎЛСАМ...

Яратгандан ҳали анча қарзим бор,
Қилолмаган қанча суннат, фарзим бор,
Кулмасангиз биттагина орзум бор:
Навоийга қўшни бўлсам жаннатда.

Ўртадаги деворимиз гуллардан,
Хизматкорлар бўлар, балки хурлардан,
Мен ул зотни қизғонардим улардан
Навоийга қўшни бўлсам жаннатда.

Фазал айтса навосига жўр бўлиб,
Тонглар ҳамду саносига жўр бўлиб,
Йиглай-йиглай қолмасайдим кўр бўлиб,
Навоийга қўшни бўлсам жаннатда.

Уйларига Бобурмирзо келарди,
Яссавий, Машраб, Ҳувайдо келарди,
Оҳ, қандоғам ажойиб иш бўларди,
Навоийга қўшни бўлсам жаннатда.

Гуллар узиб чиқаардим боламдан,
Ошлар сузиб чиқаардим боламдан,
Майли эди кетсам ёруғ оламдан,
Навоийга қўшни бўлсам жаннатда.

Сўрашса: «Сиз қаеридан жаннатнинг?»
Айтар эдим: «Қўшнисиман ҳазратнинг»
Кераги йўқ бошқа мулки давлатнинг,
Навоийга қўшни бўлсам жаннатда.

Роббим Аллоҳ, ҳимматингга кўмилсам,
Васлинг нури-раҳматига чўмилсам.
Қачон ўлсам, тупроғингга кўмилсам,
Навоийга қўшни бўлсам жаннатда.

— Эй Марҳабо, бу не орзу, не ҳавас,
Қўшниликка арзийсанми сендай кас?
— Яратганга осон ахир, ажабмас
Навоийга қўшни бўлсам жаннатда.



ЯШАШНИ ЎРГАТАМАН

Мен ўзимни севаман,
Менга ўзим ёқади,
Энди менга барибир,
Ким қанақа боқади.

Нуқсонлими, қорами,
Юзим – менинг юзимдир,
Дунёда энг чиройли,
Битта одам – ўзимдир.

Қўлим юпқа ва лекин,
Йўқдан кўра шукр, бор,
Бу дунёда ҳеч одам,
Эмас мендай баҳтиёр.

Гап эшитсам, жилмайиб,
Калтак есам, куламан,
Чап юзимга уришса,
Ўнгин тутиб тураман.

Юрак деган қабрга,
Армонимни қўмганман,
Ва устида боламга,
Ўйин тушиб берганман.

Ҳар тонг қараб ойнага
Дейман: менинг ғамим йўқ,
Мен соғломмани, мен зўрман,
Ташвишим йўқ, камим йўқ.

Ноҳушликлар бор, лекин,
Мен улардан қарз эмас,
Ҳеч қайсиси жонимни,
Тикишимга арзимас.

Хомуш бўлар баъзилар,
Сочин оқин санашиб,
Менга эса турибди,
Ажинлар ҳам ярашиб.

Тикан-тикан, гул-гулдир,
Ҳар нарса ўз ҳолича,
Азизларим, дунёни,
Қабул қилинг борича.

Осон яшай десангиз,
Маслаҳатим олволинг,
Ўзингизни озгина,
«Жинни»ликка солволинг.

Не кун кўрсам барига,
Аллоҳ рози — мен рози,
Яратганинг қўлида,
Энг тўғри тош-тарози.

Яшашга эмас бизни,
Имтиҳонга ташлабдур,
Пирим ўша ковушсиз,
Девонайи Машрабдур.

Кўйлагимни сўрашса,
Тўнимни ҳам бераман,
Тиканларнинг ичидан,
Лолаларни тераман.

Қизим қайтиб кептими?
Ажаб бўпти, хўп бўпти!
Бугун яна бойибман,
Битта ташвиш кўп бўпти.

Нархи қанча? Опкелинг,
Фамингизни оламан,
Бор пулимга ташвишу,
Камингизни оламан.

«Фам» сўзидан ўзимга,
«Шодлик» сўзин ясайман,
Мен шунаقا, ўзимни,
Хурсанд қилиб яшайман.

Телба экан-ку, дея,
Кулмангиз Марҳабога,
Барча ҳисоб-китобни,
Қўйиб қўйдим Аллоҳга.



ЎЗИНГИЗНИ ЭҲТИЁТ ҚИЛИНГ

Азизларим, меҳрибонларим,
Дўсту ёрон, қадрдонларим,
Жонингизга куяр жонларим,
Ўзингизни эҳтиёт қилинг.

Тириклик деб, чопган оталар,
Рўзғорим деб, шошган оналар,
Жонингизга куймас болалар,
Ўзингизни эҳтиёт қилинг.

Қиз аразлаб келса юрак қон,
Келин чимирилса дил вайрон,
Ағдар-тўнтар бўлса ҳам жаҳон,
Ўзингизни эҳтиёт қилинг.

Таранг-таранг тортилар асаб,
Емиаркан инсонни ғазаб,
Қон томирлар бунча мўрт, ё Раб?!

Ўзингизни эҳтиёт қилинг.

Тортишувда бир сўздан қолиб,
Нохуш гапни ҳазилга олиб,
Дилозорни Худога солиб,
Ўзингизни эҳтиёт қилинг.

Эй дўст, ҳар не касби корингиз,
Ҳамроҳ сизга ташвиш, зорингиз,
Ёнингизда юрсин дорингиз,
Ўзингизни эҳтиёт қилинг.

Ўлим – ёмон, даҳшатли тақдир,
Аммо дўзах олдида бахтдир,
Асли ўша оловдан ҳозир,
Ўзингизни эҳтиёт қилинг.

Энг аввало ношукр бўлманг,
Жоҳил билан ҳамфикр бўлманг,
Беибодат, безикр бўлманг,
Ўзингизни эҳтиёт қилинг.

Ҳаққингизни бермаса баҳил,
Кўргизсалар зулуму қаҳр,
Ҳисоб куни келар-ку ахир,
Ўзингизни эҳтиёт қилинг.

Қандай шараф, Аллоҳга қайтиш?!
Шартмас шунча ўлимдан қўрқиш,
Охиратда қолган ҳамма иш,
Ўзингизни эҳтиёт қилинг.

Сизга санчиб сўзнинг найзасин,
Яйраса шу нодон яйрасин,
Сукут билан енгинг ҳаммасин,
Ўзингизни эҳтиёт қилинг.

Кечирганни кечиур Аллоҳ,
Паноҳ берган топади паноҳ,
Ёмонликдан не чиқади, оҳ!
Ўзингизни эҳтиёт қилинг.

Дўст томонга талпининг ҳар дам,
Кўринг қувонч ташвишни баҳам,
Одам тафтин олади одам,
Ўзингизни эҳтиёт қилинг.

Куръон, ҳадис, шеърият, санъат,
Доно билан бир ширин суҳбат,
Шумасми сиз қидирган жаннат?
Ўзингизни эҳтиёт қилинг.

Фам келганда куюниб кетманг,
Бахт келганда суюниб кетманг,
Сокин яшанг, осуда яшанг,
Ўзингизни эҳтиёт қилинг.

Кўзлар ҳали кўриб турганда,
Юрак ҳали уриб турганда,
Оёфингиз юриб турганда,
Ўзингизни эҳтиёт қилинг.

Елкангизда икки фаришта,
Уларнинг қўллари ёзишда,
Марҳабо дер: ҳар сўз, ҳар ишда,
Ўзингизни эҳтиёт қилинг.

Шукр дўстлар, борингиз учун,
Фарзанд, жигар, ёрингиз учун,
Мендай харидорингиз учун,
Ўзингизни эҳтиёт қилинг.



«УШАБТУРИНГ»

Йўқ ўзбекдек болажон халқ,
Қайноаси қаҳрамон халқ,
Набиралар малах-малах,
Менинг отим – «Ушабтуринг».

Ҳовлим бўлди болабоғча,
Ҳар йил битта чақалоқча,
Кир чиқади бўхча-бўхча,
Менинг отим – «Ушабтуринг»

Уйим – марказ, уйим – пакка,
Бир он турмам ҳоли, якка,
Уйғонишар турмай ҳакка,
Менинг отим – «Ушабтуринг».

Фикр, зикр тиловат йўқ,
Уйқумдаям ҳаловат йўқ,
Шундан юзда тароват йўқ,
Менинг отим – «Ушабтуринг».

Тилим эртагу аллада,
Ҳеч не қолмади каллада,
Ҳамма билар маҳаллада,
Менинг отим – «Ушабтуринг».

Уйим тўла китоб, уни
Ўқишига бир фурсат қани?
Овутиб бир тирранчани,
Менинг отим – «Ушабтуинг».

Етказганига минг шукр,
Нетай, толса бошим қурғур?
Нолиётган бўлсам узр,
Менинг отим – «Ушабтуинг».

Қўлимда бўлса биттаси,
Этагим тортар тўрттаси,
Атрофда яна ўнтаси,
Менинг отим – «Ушабтуинг».

Ҳой, укангни туртма, болам,
Ҳой, пардани тортма, болам,
Китобимни йиртма, болам,
Менинг отим – «Ушабтуинг».

Ҳой-ҳой, гулни узиб қўйма,
Соатимни бузиб қўйма,
Иштонингга сузиб қўйма,
Менинг отим – «Ушабтуинг».

Ойлиги йўқ қози – ўзим,
Занжири йўқ този – ўзим,
Ким не деса рози ўзим,
Менинг отим – «Ушабтуинг».

Дарё эдим оқмай қолдим,
Ойнага ҳам боқмай қолдим,
Эримга ҳам ёқмай қолдим
Менинг отим – «Ушабтуинг».

Ёшлигингда отасин бок,
Қариганда боласин бок,
Аёл борми биздай «қолоқ»?
Менинг отим – «Ушабтуинг».

Кўпайишар борган сари,
Ичикармиш қилсам нари,
Ўлиб кетсам қолар бари,
Менинг отим – «Ушабтуинг».

Асабларим элак-элак,
Falvalardan ўйнар юрак,
Жоним ўзимга ҳам керак,
Менинг отим – «Ушабтуинг».

«Той-той» турди, юриб кетсин,
Йиқилибди, туриб кетсин,
Олим, дониш бўлиб кетсин
Менинг отим – «Ушабтуинг».

Ўртоғларим, айланайлар,
Эшитмасам бақирманглар,
«Марҳабо», деб, чақирманглар,
Менинг отим – «Ушабтуинг».

Ёзим ўтиб, қишига кирдим,
Falva, жанжал, муштга кирдим,
Чўриликка ишга кирдим,
Менинг отим – «Ушабтуинг».



ЗАМОНАВИЙ ЭРТАК

Бир чолнинг «Запарож»и
«Нексия»га урилди,
«Нексия»нинг орқаси,
Синди, тушди, сурилди.

Бўғилиб чолга деди,
«Нексия»нинг эгаси:
— Биласизми, қанчага,
Тушар бунинг чегаси?

Бўёқ, чироқ, ўҳ-хўй, бу
Фалон пулсиз битмайди,
Ҳатто машинангизни,
Сотсангиз ҳам етмайди.

Чол дейди: — Болам, тўхта,
Худодан-ку бўлса не,
Кўрсатаман бир нарса,
Машинамга ўтириш, ке.

Кўйнидан бир хумчани,
Олиб шивирлади чол:
— Бизга кўк чой дамлаб кел,
Ҳой, жин, қани, чиқа қол.

Хумчасидан жин чиқиб,
Чойни қилди мұхайё,
Йигит ёқасин ушлаб,
Деди: — Астағифируллоҳ!

У бундай мүъжизани
Күрмаганди ҳеч қачон,
Деди: — Шу хумчангизни,
Менга сотинг, отажон.

Чол сўзлади: — Бу хумча
Менга қолган отамдан,
Бу эсдалик нарсани
Сенга қандай сотаман?

Йигит чолни авради:
«Нексия»ни бераман,
Ва устига ўн миллион,
Сўм ҳам олиб келаман.

Бир лаҳзада хумчанинг,
Бозори кетди қизиб,
Йигит «Нексия»сини
Чолга берди ўтказиб.

Уйга келиб, хумчани
Ишқалади — чиқди жин,
Ҳамма ҳайрон, жин деди;
— Нима қилай, хўжайин?

— Хотинимга, қизимга,
Машина, тақинчоқлар,
Ўғилларимга завод,
Фабрика, ҳовли-боғлар.

Менга эса бир юртнинг,
Пошиболигин бера қол,
Бизга не сотганини,
Кўриб қўйсин, лақма чол.

«Нексия» ҳам матоҳми?!
Мен ҳайдайман самолёт.
Йўқ-йўқ, қўлимда бўлсин,
Бутун бир аэрофлот.

Кўрқиб кетиб йигитга,
— Шошманг-шошманг, — деди, жин,
Кимга нима, дедингиз,
Тушунмадим, хўжайин?

Сиз айтган нарсаларни,
Қила олмайман чиндан,
Чунки мен бори йўғи,
Чой дамлайдиган жинман.

Бузилиб атроф-муҳит,
Не кўйларга солмади?!
Ҳатто эртаклардаям,
Ҳақиқий жин қолмади.

Хуллас, йигит хумчани,
Жинга отиб урибди,
Чол «Нексия»да зув-зув,
Кира қилиб юрибди.



ИККИНЧИ КИТОБ

(Ҳазил)

Алҳол чиқди китобим,
Турган эди босилмай,
Пул чиқмасди «ҳомий» – эр,
Бўйнига минг осилмай.

Вой, чиқди-я шу китоб!
Кувончдан кўз нам бўлди.
Бутун юртга тарқаган,
Шеърлар охир жам бўлди.

Юз минг нусха, ҳазилми?!
Дўконлар кетди тўлиб,
Аммо уч кун деганда,
Одоғ бўлди сотилиб.

Уйга бўлар қўнфироқ:
«Бизга етмай қолди-ку,
Мухлисларнинг устидан
Куляпсизми, нима, бу?»

Мендан қанча танишлар
Хафа бўлиб кетмади,
Дедим: «Мени тушунинг,
Ўзимгаям етмади».

Китобим бўлиб кетди,
Таржима кўп тилларга,
Демак, менинг номим ҳам,
Кирди қанча дилларга.

Сотилётганмиш китоб,
Ҳиндистоннинг йўлида,
Кимдир кўриб қолганмиш,
Рим Папасин қўлида.

Рухланиб кетдим жуда,
Ўзимгаям қойилман,
Ҳамма ўқияптими,
Демак, мен зўр шоирман!

Тавба, астағфириллоҳ,
Ўзинг кечир, Худойим!
Омадни Сен улашиб,
Банданг мақтанар доим.

Китоб чиқди дунёга,
Аммо кўнглим тўлмади,
Устоз Зулфия опа
Афсус буни кўрмади.

Татимади бу қувонч
Озод Шарофиддинсиз,
Билмадим, ё «савалаб»,
Ё алқар эди, эсиз.

Кўрмади кўп устозлар,
Бироз кўнглинг сўларкан,
Ҳеч бўлмаса Сайд Аҳмад
Ўлмай турса бўларкан.

Энди Ўткир Ҳошимга,
Худодан умр тилай,
Ва Иброҳим Фурнинг,
Борига шукр қиласай.

Рим Папаси-ку майли,
Элимга не наф бўлди?
Бу китобим хақида,
Осмонда не гап бўлди?

Бошим қотиб, бузилиб,
Турганида роҳатим
Минг шукурки, жиринглаб,
Уйғоворди соатим.

ДҮСТИМИЗ ИЗЗАТИЛОННИНГ ПҮСТИНИГА

(Абдулҳай Каримов тилидан)

Қиши кунида боргандада Самарқандга бечопон,
Сени кийдирди менга бир ошнаи қадрдон,
Деди: «Уйга етгунча кийиб юринг, акажон,
Каттақўрғонлик дўстим устимга ёпган, пўстин.

Бу қаҳратон совуқда юриб бўлмас пўстинсиз,
Яна шамоллаб қолманг, ҳофизгина дўстимсиз»,
Малҳам бўлдинг жонимга, нима қиласадим сенсиз?!
Каттақўрғонлик дўстим устимга ёпган, пўстин.

Фил териси эдингми, бунча қалин бўлибсан?
Қай манзилда ошланиб, қай манзилда қурибсан?
Шу ерда ҳам эгангга савоб йифиб юрибсан,
Каттақўрғонлик дўстим устимга ёпган, пўстин.

Кийиб юриб қилурман, ҳар тугмангга минг шукр!
Ҳар ёқанг-у, ҳар ёнинг, ҳар бурмангга минг шукр!
Ҳар чўнтагинг, ҳар чокинг, ҳар бўлмангга
минг шукр!
Каттақўрғонлик дўстим устимга ёпган, пўстин.

Олқишлиб юрди сени, ҳар елкам, ҳар курагим,
Сен илиқ сақлаб турган, ҳар ўпкам, ҳар суягим,
Мехр учун таъзимда, ҳаммадан ҳам юрагим,
Каттақўрғонлик дўстим устимга ёпган, пўстин.

Гоҳо бошимни ўраб, гоҳо ёпдим устимга,
Гоҳо елкамга ташлаб, гоҳ тӯшадим остимга,
Қайтганингда бир қучиб, «раҳмат» деб
 кўй дўстимга,
Каттақўрғонлик дўстим устимга ёпган, пўстин.

Саккиз қарич жуссамга бир енгинг ҳам етарди,
Совқотганда янганг ҳам кирса, сифиб кетарди,
Жаннатда юргандайин жисмим қўшиқ айтарди,
Каттақўрғонлик дўстим устимга ёпган, пўстин.

Қилиб юрдим дуолар, чертиб, қоқиб, пуф-пуфлаб,
Чўнтаклари ақчага тўлиб юрсин, суф-суфлаб,
Сени кийган дўстимга кўз тегмасин, туф-туфлаб,
Каттақўрғонлик дўстим устимга ёпган, пўстин.

Энди ҳар қиши сени бир эсламасам бўлмайди,
Ошноларга сен ҳақда сўзламасам бўлмайди,
Сенга атаб бир қўшиқ куйламасам бўлмайди,
Каттақўрғонлик дўстим, устимга ёпган пўстин.

Ашъор-ла соҳибингни дуо қилур Марҳабо:
«Иссиққина танида эскиргин, иншооллоҳ,
Умрию давлатини зиёда қилсин Аллоҳ»,
Каттақўрғонлик дўстим устимга ёпган, пўстин.

ЭНГ ГЎЗАЛ ҲАДИС

«Ҳадеб динингиздан гапириб,
одамларни зериктирмасдан, ҳазил-
лашиб ҳам туринглар».

Саҳиҳ ҳадислардан

Бир кампир деди: «Ё, пайғамбар,
Жаннатиманмикин, бер хабар?»
Расулуллоҳ кулиб дедилар:
«Кампирлар жаннатга кирмайди».

Демакки, савоби ошса ҳам,
Иймони қўпириб тошса ҳам,
Ҳаж дея югуриб шошса ҳам,
«Кампирлар жаннатга кирмайди».

Бекор, минг мискинни тўйдирсин,
Дажжолнинг бўйнини синдирсин,
Шайтонни тошиб ўлдирсин,
«Кампирлар жаннатга кирмайди».

Исонинг онаси бўлса ҳам,
Мусонинг холаси бўлса ҳам,
Айюбнинг боласи бўлса ҳам,
«Кампирлар жаннатга кирмайди».

Олса ҳам эрининг ризосин,
Хизири Илёснинг дуосин,
Эҳсон қилса ҳам бор дунёсин,
«Кампирлар жаннатга кирмайди».

Бир умр рўзадор юрсин, йўқ!
Каъбани қайтадан курсин, йўқ!
Аршни даст кўтариб турсин, йўқ!
«Кампирлар жаннатга кирмайди».

Жаннат бу — яшнаган гулхона,
Жаннат бу — ёшлиқ, бу — нурхона,
Жаннат бу — завқу шавқ, тўйхона,
«Кампирлар жаннатга кирмайди».

Жаннатда ким юрар ҳассалик?
Оқсаган-тўқсаган, фуссалик?
Жаннатта бегона кексалик,
«Кампирлар жаннатга кирмайди».

Жаннатда туришиб ўzlари,
Оғриса тиззасин кўzlари,
Уқалаб туурми қизлари?
«Кампирлар жаннатга кирмайди».

Ёнбошлаб олтиндан сўрида,
Тиллодан билагузук қўлида,
Инқи́ллаб туришса, тўғри-да,
«Кампирлар жаннатга кирмайди».

Жаннатда ажинли юзлар йўқ,
Оху воҳ, ҳасратли сўзлар йўқ,
Ям-яшил баҳор бор, кузлар йўқ,
«Кампирлар жаннатга кирмайди».

Жаннат бир боғ эрур муҳташам,
Хурлар соч тараган бир ҳарам,
Хомтама бўлмасин чоллар ҳам,
«Кампирлар жаннатга кирмайди».

Кампиршо йиглади: Эҳ, аттанг,
Оллоҳим, қилдинг-ку ҳолим танг,
Шунча торми ўша томорқанг?
«Кампирлар жаннатга кирмайди».

«Оҳ», деди, «дод», деди у кампир
Бўлдикми шунчалар бекадр,
Бу қандай бедодликдир, ахир?!»
«Кампирлар жаннатга кирмайди».

Болага сарф этса бор кучин,
Рўзгор деб тинмаса туну кун,
Нимага, нимага, не учун,
Кампирлар жаннатга кирмайди?

Пайғамбар кулдилар бир нафас,
Дегандай: «Киурлар, бўлди, бас!»
Фақат бу кексайган ҳолдамас,
«Кампирлар жаннатга кирмайди».

«Жаннатга киурлар ёш бўлиб»,
Юзлари ой, қаламқош бўлиб,
Саксонмас, ўн саккиз ёш бўлиб.
«Кампирлар жаннатга кирмайди».

Кампиршо ичидан кетиб зил,
Турғанди кўнглига сифмай қил,
Билса бу — чиройли бир ҳазил,
«Кампирлар жаннатга кирмайди».

Марҳабо, кичигу каттамиз,
Яхшилик қилгувчи ҳаммамиз,
Яна гул ёшликка қайтамиз,
«Кампирлар жаннатга кирмайди».

ЙИРТИҚ КАМЗУЛ

Бир камзулим бор эди,
Кийса, одам уялар,
Чунки олмадек жойин,
Еб қўйишиган куялар.

Қишда уни эҳсон деб,
Бердим муҳтож қўшнимга,
Ўша куни шу камзул,
Кириб қолди тушимга.

Ўтганмишман оламдан,
Чоршанбанинг тонгида,
Турганмишман дўзахнинг,
Шундоққина ёнида.

Эмишман шир яланғоч,
На молим бор ва на пул,
Кўзларимда даҳшату
Кўлимда йиртиқ камзул

Оҳ, у олов, у азоб!
Қоврилармиш одамлар,
Қайта-қайта ёнишиб,
Соврилармиш одамлар.

Ўт менгаям уармиш,
Ёқай деб юз, кўзимни,
Шу тешик камзул билан,
Тўсармишман ўзимни.

Фақат, йиртиқ жойидан,
Ҳар гал жоним куйганда,
Дер эмишман: «Қанийди,
Камзул бутун бўлганда».

Эссизгина тириклик,
Курсин кийиб, еганим,
Шуми ёруғ дунёдан,
Ўзимга обкелганим?!

Оҳ, қўшним-а, шунгаям
Суюниб «Раҳмат!» деган,
Олгани-чун раҳматни
Мен айтсан бўлар экан.

Кийимларим жавонга,
Сифиб туарди аранг,
Сандиқда қанча латтам
Қолиб кетди, эҳ, аттанг.

Қариндошлар ичра ҳам
Қийналганлар бор эди,
Чехрасидан билардим,
Ким нимага зор эди.

Гадой сўраса юз сўм,
Жаврардим энсам қотиб,
Табассум билан эмас,
Бердим юзига отиб.

Билсам, муҳтож қўлига
Тутқазганим бир тилло,
Охират сандигимга
Тушаркан бўб минг тилло.

Йифиб меросхўрларга
Қолиб кетар молимни,
Ўйламабман ўзим-ла
Олиб кетар молимни.

Ёшлигимда ҳар нени
Деяверсам «меники»,
Бобом дерди: «Эй, болам,
Берган нарсанг — сеники.

Кийинтирган кийинар,
Едирганлар ейдилар,
Бирини кийсанг, бирин
Эҳсон қилгин», дердилар.

«Шош, — дердилар, — яқинда
Мұхтож одам қолмайды,
Садақа қиласай десант,
Хеч бир одам олмайды.

Хоҳ яширин, хоҳ ошкор,
Эҳсон қилгин күпми, оз,
Ҳатто, табассуминг ҳам
Жаннатга бир имтиёз.

Йиртиқ камзулни ушлаб,
Бир нарсани ўйлардим:
Билганимда тўнимни,
Эҳсон қилган бўлардим.

Қарашиб қол, Марҳабо,
Мискиннинг ош, нонига,
Ўлмай туриб, кириб ол
Жаннатнинг айвонига».

ИККИ САНДИҚ «СЕП»

Ҳазил

Шукр, юртда түқчилик,
Тўлмоқда эл кармони,
Шунданми, билмам, келди
«Ясан-ясан» замони.

Бу тўғрими, хатоми,
Қайдам, Оллоҳ билади,
Негадир ҳамманинг зўр
Кийингиси келади.

Саксон ёшли кампир ҳам
Фориғмас бу хатодан,
Кўйлак кийгиси келар
Янги чиққан матодан.

Кетиб жисмин оҳори,
Турса ҳамки қилтиллаб,
Аёл аёл экан-да,
Юрсам дейди ялтиллаб.

Инсонга ҳар ёшда ҳам,
Ярашар янги либос.
Қани энди, қалбни ҳам,
Ясатолсак шунга мос.

Баъзан бир китоб учун
Қизғонамиз уч мингни,
Кийим ёқиб қолса-чи,
Сарф қиласиз юз мингни.

Мақтанади бир аёл:
«Қишига түним түрттадан.
Кўйлагимни санасам,
Ошиб кетар ўнгадан.

Рўмолим-ку беҳисоб,
Камзул кўп қиши-қировга,
Ҳаммасин кийгим келар,
Бергим келмас бировга.

«Ортигини эҳсон қил!»
Дер бир овоз юракда,
«Нимага?» дейман, ахир,
Ҳаммасиям керак-да.

Тўрт кўйлак ресторанга,
Тўйлар учун тўрттаси,
Келин салом, чарларга
Кийилар тўққизтаси.

Ана, боя айтдим-ку,
Хеч бири турмас бекор.
Ҳаммасиям керакли,
Ҳаммасининг ўрни бор.

Опам дейди: «Ҳой, инсон,
Шу туришда кетмагин,
Дарду ҳасратинг — кийим,
Ўлимниям эслагин».

Опам тўғри айтади,
Қолмайин-да уятга,
Дўконма дўкон чопиб
«Сеп» йифдим охиратга.

Ўнта кўйлак сотволдим,
Бозор, мозор, бирровга,
Икки кўйлак фассолу,
Икки кўйлак гўрковга.

Тўрттасини мен ўлгач,
Сандигимдан топишар,
Барин «подцвет» қилиб,
Тобутимга ёпишар.

Бозорда юрсам, битта
Гадой келди ёнимга
«Садақа, садақа» деб
Тегиб кетди жонимга.

— Не оляпсиз? — дер гадой,
Хе, сендақа соқчидан!
— Кафан! — дедим, — сизлардан
Үлиб кутулмоқчиман.

Тўрт бозорни айланиб,
Топдим қиммат-баҳосин,
Кафаникка сурфнинг ҳам
Олдим алламбалосин.

Вой-вўй, тобут ёпқичим!
Бўлди роса қиёмат,
Зангори духобага
Тикилган заррин оят.

Агар шу оят бўлса,
Курт қумурсқа тегмасмиш,
Кафанимни ўшандা
Куя-муя емасмиш.

Тобутимни кўриб ҳам,
Душманларим ўлворсин,
«Гап»даги ўртоқларим
Кўришиб «Ваҳ!» деворсин.

Айтганча, кафани ҳам
Мен ўн бешта қиласман,
Биринчи кун учтасин
Алмаштириб кияман.

Бирин тобутга кийсам,
Бошқа бири — лаҳадга,
Бириси Мункар-Накир
Кирадиган соатга.

Қиёматгача токай,
Бир кафанды юраман,
Бири чириса, бирин
Алмаштириб тураман.

Қандай ётиб бўлади,
Чирик, йиртиқ кафанды,
Маликалардай яшаб,
Шундай ётсам, алам-да...

Айтгандай, сўроқ-савол
Бўлар эмиш, албатта,
Паспортим сериясин,
Сўрасалар керак-да.

Каримова Марҳабо,
С, А, ўн етти, тўқсон...
Ёллаб олдим, кўз юмиб
Айтиб бераман осон.

Билиб кўйисин опам ҳам,
Ким узоқни кўради?!
Ўлимни эслаб туриш
Мана бундай бўлади.

Қойилмисиз, мен қандай,
Донишмандман, хушёрман,
Икки сандиқ «Сеп» билан,
Охиратга тайёрман».



ҚУМГА КҮМИЛГАН ОДАМ

(Ривоят)

Мусо алайҳиссалом
Бир тофни қилиб маскан,
Роббиси чорлаганда,
Сўзлашгани бораркан.

Яна ўша томонга
Кетаётса бир куни,
Бир бой одам тўхтатиб,
Гапга солибди уни.

Айтибдики: «Аллоҳга
Шукур, шукур, минг шукур,
Бандасини неъматта,
Ўраб қўйибди буткул.

Қалбларни тўлатибди
Мехр-шафқат, иймонга,
Ақлу тафаккурдир энг
Кераклиси инсонга.

Жисмимда қанча неъмат,
Оёғу қўл, кўз, қулоқ,
Атрофимдагиларин
Санаб этолмам адoқ.

Бойлигим ҳам негадир
Кўпаяр борган сари,
Ўн танга эҳсон қилсам,
Қайтар юз баробари.

Бойлик яхши-ку, лекин
Охират бор, биламан,
Ҳар танганинг ҳисобин
Сўраса, не қиласман?

Кўрқаман шунинг учун,
Ташвишдаман туну кун,
Сўраб беринг, не қилсам,
Бойлигим камаяркин?»

Хўп, дебдилар пайғамбар,
Юргач икки юз қадам,
Учрапти белигача,
Кумга қўмилган одам.

У дебди: Оч-юпунман,
Эй, Мусо, ёмон ҳолим,
Иштоним йўқлигидан,
Кумга қўмилиб олдим.

Оёқ, қўлим бут, аммо,
Иш йўқ ишлайин десам,
Яқинларим қараашмас,
Нон йўқ, тишлиайн десам.

Бу қум ҳам бир бўлмагур,
Оғирлигини қаранг,
Гоҳ исиб, гоҳ совийди,
Чидаб турибман аранг.

Роббингиздан хафаман,
Дунёсида тартиб йўқ,
Ким кулади, ким йиглар,
Бирор очу бирор тўқ.

Кимдир қисқа яшар, ким
Юз ёшда ҳам ўлмайди.
Одил бўлса, нимага
Ҳаммани тенг кўрмайди?

Юборай бир хат десам,
Йўқмиш манзил-макони,
Кўрсангиз, айтиб қўйинг,
Ўнгласин бу дунёни.

Ҳар нарсани кўради,
Бедор дерлар ўзини,
Аммо менга келганда,
Юмволади кўзини.

Синов, деб бандасини
Эзib ташлади жуда,
Яратганидан кейин,
Хабар-пабар олсин-да.

Нега ҳамма шоду, мен
Дард-ҳасратга тўламан?
Тўйиб кетдим, сўранг-чи,
Не қилсан бой бўламан?

Аллоҳ билан сўзлашиб,
Мусо ортга қайтиби,
Саволларга ул Зотнинг
Жавобини айтиби.

Бойга дебди: «Нолигин,
Етганича қурдатинг,
Ношукур бўлаверсанг,
Камаяркан давлатинг».

Кумга кўмилган одам
Олдига келиб деган:
— Нолимасдан ҳар доим,
Шукур қиласан экан.

— Ўзи иштонсиз бўлсам,
Юрсам оч-юпун фақат,
Роббингнинг нимасига,
Шукур қиласан, номард?!

Шунда қумни учириб,
Дайди шамол кеб қолди,
Ношукурнинг танаси
Қип-яланғоч бўб қолди.

Ана халос, бу гаплар
Йўқ эди ҳеч ўйимда,
Энди билволдим — нега
Барака йўқ уйимда.

Тилим зикр бошлиди,
Шу онда беихтиёр,
«Шукур» десам сифаркан,
Бир нафасга ўттиз бор.

Ҳали дунё билмайди,
Бойишнинг бу йўлини
Яшар баъзи одамлар
Кумга кўмиб ўзини.

УЗАТИЛАЁТГАН ҚИЗГА ОТА ДУОСИ

Иzlарингиз бўлсин, омин, гул иларайхон,
қизим.
Ҳам муборак, қутли бўлсин сиз борар ошён,
қизим.

Келдилар ўз ҳожангиз, менга омонат эрдингиз,
Топшиурман қўлларига тинч, сиҳат, омон,
қизим.

Ҳар аёлга эр туур мавқеда Аллоҳдин кейин,
Хоҳи қул, хоҳи қарол, хоҳ бўлсин у султон,
қизим.

Энди ҳожангиз ҳудуди бўлди қалбу жисмингиз,
Ҳуснингизни қилмагайсиз элга дастурхон,
қизим.

Пардоз-андоз, ноз-итоб бир ҳожангиз ҳаққи
туур,
Ёт киши олдида ёшуриб қилинг пинҳон, қизим.

Ҳовлингиздан чиқмагайсиз ҳожангиздан беизн,
Софиниб, ҳатто, онангиз бўлса ҳам гирён, қизим.

Ёт киши бирлан ўзингиз қолмагайсиз ҳеч қачон,
 Кўнгли иллатли, маразлилар қилур бўғтон,
 қизим.

Сўзламанг овозингизни ўйнатиб ҳар касга сиз,
 «Сенда кўнгли бор», дебон қутқу солар
 Шайтон, қизим.

Фитна солса у яна «Хожанг ёмон, яхшиси бор...»
 Ҳайданг ул нопокни сиз қўлга олиб гаврон,
 қизим.

Эгнингизга кийдирурман сабру тоқат тўнини,
 Бесабрга нафсидин шайтон қўюр қопқон, қизим.

Қолди ота уйингиз, бундан буён шу ҳожангиз
 Гўжа еса гўжа енг, талқон еса талқон, қизим.

Ҳожангиз сизга либосдир, ҳожангизга сиз либос,
 Ечмагайсизки илоҳий икки бул чакмон, қизим.
 Ўтса гап, рўзгорчилик, аввал узр сиздан бўлур,
 Шунда бўлгай беадаб шайтон дили вайрон,
 қизим.

Ҳожангизни яхши ишларга фақат даъват қилинг,
 Ҳам илм, ҳам касбу корга бўлсин ул полвон,
 қизим.

Озми-кўпми топганига шукур этинг ва сабр
этинг,
Бандасига катта бойлик аслида — иймон, қизим.

Сизга Холиқ айтди: «Кўзни ерга тик,
зийнатни ёп!»
Қани энди «Хўп» демоққа топсангиз имкон,
қизим.

Дейдилар: Яхши аёл сақлар ҳаромдан жуфтини,
«Хўп» дегайсиз бўлса қанча тўғри сўз,
фармон, қизим.

Чорласа ўчоқ бошида бўлсангиз ҳам тез келинг,
Тонгми, пешинми, аср ё, хоҳ бўлар хуфтон,
қизим.

Ёнингиздан ҳожангиз ҳеч таъби ранжиб чиқмасин,
Ҳарна қилсангиз қилинг, кўнглини этинг
шодон, қизим.

Иншооллоҳ, уйингиздан келтиурсиз яхши гап,
Аччиғин ерга кўмиб, уйда қилинг гумдон, қизим.

Ҳар аёлдан эри рози бўлса — Аллоҳ розидур,
Берилур унга мукофот — жаннати ризвон, қизим.

Бахтингиз – бўлса ҳаёт қайнона-ю қайнотангиз,
Сиз – ниҳолга бўладурлар яхши бир боғбон,
 қизим.

Хожангизга уқтириингки, отасин айлаб ризо,
Бўлсин ул мушфиқ онасин дардига дармон,
 қизим.

Малҳаму юмшоқ бўлинг сиз ҳам аларнинг олдида,
Иншооллоҳ, хизматида бўласиз чаққон, қизим.

Ўрнатинг доим аҳиллик эгачи-овсин ила,
Тинчи йўқ уй – отаю она учун зиндан, қизим.

Энди масъул бўлдингиз рўзғоргаким,
 хушёр туринг,
Исроф этманг сув, чироқ, пўчоқ, олов ё нон,
 қизим.

Косаю пиёлани ушланг авайлаб, синмасин,
Асрамас бўлса тугар, бўлганда ҳам минг кон,
 қизим.

Сақламанг нопок идиш, кир, битта тушса –
 бир ювинг,
Бўлмасин кирдан, ювуқсиз нарсадан хирмон,
 қизим.

Ошхонада ўт-оловга доимо ҳушёр бўлинг,
Эсингиздан чиқмасин суви қуриб қумғон, қизим.

Иш тежоғлиқ бўлса, уйга қут кирар, қайнонангиз:
«Бу гўдак қайда пишибдур?!» деб бўлур
ҳайрон, қизим.

Ҳар юмушни бошланг ўнг қўлу ва бисмиллоҳ ила,
Бор ҳадиски: ўнг томонда барокат, уммон, қизим.

Ҳарки ниятни қилурсиз, «иншооллоҳ», деб олинг,
Содир ўлғой ҳарна иш – Аллоҳ эса ёзғон, қизим.

Ҳожангиз изни ила ҳар қўшнидан олинг хабар,
Хоҳ таом, хоҳ яхши сўз, ҳарна қилинг эҳсон,
қизим.

Яхшиларга яхшилик айлаб, Худони «қарз» қилинг,
Хоҳ мусоғир, хоҳ йўловчи, хоҳ бўлур
мехмон, қизим.

Баъзи хотунлар каби бўлманг ҳавас, мол жинниси,
Пул топай деб ҳожангиз кўп бўлмасин сарсон,
қизим.

«Фийбат — одам гўштини тотмоқ билан тенг»,
дейдилар,
Кўшилиб пок оғзингизни қилмагайсиз қон,
қизим.

Минг шукурки, кўлингизда касбу кор,
илему ҳунар,
Элу юрт тинч — кўнглимиз тинч, яхши
бу даврон, қизим.

Беадаб, нодон, илмсиз элга кони ғалвадир,
Одамийнинг жоҳилидан яхшидир ҳайвон, қизим.

Кўшдириб қўйдим сепингизга баҳосиз
мулк — китоб,
Молингиз бут бўлмади деб қилмайин армон,
қизим.

Қодирий, Машраб, Навоий ҳам Ҳувайдо сизгадир,
Ҳам Бухорийдан ҳадис, уммул китоб —
Куръон, қизим.

Сизга бу панд, ўн мошин сеп берганимдан
яхшидур,
Икки дунё баҳтини қўзлаб яшанг, жайрон қизим.

Сиз бирорнинг хасмисиз, ош-нон
умид қилмам сира,
Тинч, омон, соғ бўлсангиз — бас, бошимиз
осмон, қизим.

Отангиз панди ёзилди Марҳабо илки ила,
Бу ўтинчни ёдингизда сақлагайсиз, жон қизим.

Яхши боргайсиз ва биздан рози бўлгайсиз, онам,
Мушфиким, жоним, жигарбандим, менинг
бийрон қизим.

Энг «муҳим» гап қолмасин: гар қиз-ўғил
берса Худо,
Бешигу памперсига бизлар балогардон, қизим.



ЖАННАТДАГИ «КУНДОШИМ»

Қуйилмади ҳеч эрим,
Ичим тўла ўкиниш.
Эллик ёшдан ошса ҳам,
Айшу, ишрат, сўкиниш.

Шундай безор бўлдимки,
Зирриллардим келсаям.
Хафа бўлмасдим агар,
Жавобимни берсаям.

Охирати не бўлар?
Энди Аллоҳ билади.
Наққошлигини ташлаб,
Судхўрлик ҳам қиласди.

Ялинаман: «Ёшмассиз,
Тўгри юринг, дадаси,
Жон — омонат, ўлим — ҳақ»,
Десам, қотар энсаси.

Бу одамни тек қўйсам,
Энди шундоқ ўтади.
Агар бир гап бўлса ҳам,
Нақд дўзахга кетади.

Вой-вой, Худо сақласин,
Кўрқитаман дўзахдан.
Парвойи фалак, бир кун,
Гап бошладим жаннатдан.

Дедим: Дарёсида май,
Тубида лаъл, дурлар бор.
Дадаси-чи, жаннатда
Ўн тўрт ёшли ҳурлар бор.

Қоматлари келишган,
Ҳарирдир кўйлаклари.
Кўриниб тураг шундоқ,
Болдирин иликлари.

Биқинлари тасмадек,
Семизмас менга ўхшаб,
Роҳат қиласиз нафис
Бармоқларини силаб.

Кўзларингиз қамашар
Баданининг нурига,
Фақат пок эркак лойиқ,
Жаннатнинг бу ҳурига.

«Оҳ!» — деди-ю эримнинг,
Ловуллади юзлари,
Ўша хурни кўргандек,
Деди ёниб кўзлари:

— Ўйлабманки, жаннатда,
Мева-чева бор, холос.
Унга қандай киради,
Ўргатиб қўй, илтимос.

Дедим: Ичишни ташлаб,
Ҳалол ҳунар, касб қилинг,
Хулқингиз бўлсин гўзал,
Судхўрликни бас қилинг.

Аллоҳ деб, дўст бўласиз,
Илм, ҳунар, санъатга,
Поклигу иймон билан,
Кирилади жаннатга.

Деди: — Ҳурдан рашк қилиб,
Ҳурпаймайдими патинг?
Дедим: — Минг бор розиман,
Илоё, қўша-қаринг!

Деди: — Сен не қиласан,
Мен билан бўлса улар?
Дедим: — Шундай жаннатда
Менгаям жуфт топилар.

— Ундай бўлса, керакмас!
Деди қайнаб зардаси.
Дедим: — Хотиржам бўлинг,
Ҳазиллашдим, дадаси.

Тонгда мени уйғотди,
Юзи тўла нур билан,
Бир қўлида китобу,
Бир қўлида гул билан.

Дедим: — Вой, нима бўлди,
Нега тегдиз гулимга?
Деди: — Илиниб кетдим
Жаннатдаги хуримга.

«Тавба, Тавба! Қойилман!»
Дедим, кўксимга уриб,
Шу эргаям бир гапни
Бўларкан-а уқтириб.

Тутаган шамчироққа
Күйган каби мойини,
Вой-вой, шу қайсарниям
Топдим нозик жойини.

Бошлади янги ҳаёт,
Чизди гүзал нақшлар.
Ҳатто чет элдан келиб,
Сотиб олар мухлислар.

Яшар қалби, жисми пок,
Эл-юртини севади,
Вақт топиб баъзан, ҳатто,
Теннис ўйнаб келади.

Энди бизнинг «мавлоно»,
Менга қиласар насиҳат,
Ҳар сўзида юз маъно,
Ҳар ишида юз ҳикмат.

Ундан безор бўлгандим,
Кулсангиз ҳам айтаман,
Бугун уни шу ёшда
Севиб қолдим қайтадан.

Ҳатто, ўша хурлардан,
Рашк қилиб қолдим андак,
Жаннат эшигидан ҳам
Мўралаб турсам керак.

Дарвозасига ёзиб
Кўяман шу шеъримни:
Эй, жаннатнинг хурлари,
Хафа қилманг эrimни.

Сизга лойиқ қилгунча,
Бадқилиқ бу кишимни,
Ердан териб олганман,
Синган қанча тишимни.

Ёрилди қанча курси,
Қанча эшик, ойнаклар,
Учib ўтган бошимдан
Қанча ликоб, чойнаклар.

Меҳнатини мен кўрдим,
Оқди қанча кўз ёшим,
Роҳатини сиз кўринг,
Жаннатдаги кундошим.

Эрим қайта ёшариб,
Ёнингизга кирган дам,
Дуо қилиб қўйинг бир
Марҳабо шўрликни ҳам.

Сиз ҳақда бир эшиитган
Эркак ҳоли шу бўлса,
Нима бўлар экан-а,
Ўзингизни бир кўрса?!



ГУЛДАСТА – 1

Кўксинг ёниб кетаркан,
Севиб қолсанг агарда.
Ўқигандим мен буни
Қайсиdir бир асарда.

Эrim гул олиб келди,
Менга берди айвонда.
Бир-бирини имлашиб,
Келинларим ҳайронда.

Қотиб қолдим ҳайратдан,
Не бўлди бу кишига?
Тушунолмай лол эдим
Бу дунёning ишига.

Йифлавордим баҳтимдан,
Яратганга ташаккур,
Қариганда бўлсаям
Қадр топдим, минг шукур.

Қандай нозик гулдаста,
Қойил қолдим дидига.
Дейсиз, гўё ёш йигит
Опти севган қизига.

Шунча гўзал бўлурми
Оддий атиргул, нарғис?
Фунчалари йўргакда,
Тиканлариям нафис.

Гулдай гўзал бўб кетди
Эримнинг қош, кўзиям.
Ўн минг сўмдан камига
Олмагандир ўзиям.

Шунча пулга бу гулни
Севганидан олган-да!
Баъзан пиёла отса,
Дебман: «Кўнгли қолган-да...»

Севмайди, деб ўйлабман
Қарамаса қайрилиб,
Сал бўлмаса, бир йили
Кетай дебман айрилиб.

Эрим ўзи «жентельмен»,
Эрим ўзи меҳрибон!
Уриб, туртиган бўлса,
Аслида, ўзим ёмон!

Баъзан тортишиб қолсак,
Қолмас эдим бир гапдан.
Ювош турганим билан,
Ман ҳам «чаканамасман».

Шу бугундан севаман,
Бақирсаям, майлига.
Бир лаҳзада айландик
Мажнун билан Лайлига.

Гулдастани гулдонга
Солиб қўйдим авайлаб.
Шу бугун пардоз қиласай
Эрим учун атайлаб.

Тошойнага боқдим-у,
Уялиб кетдим фақат.
Мени хотин қиб юрган
Шу одамга минг раҳмат!

Қани бел, қани елка,
Қани қош, қани киприк?
Қойил сенга аёлни
Чалғитган тирикчилик!

Ўша куни ўзимга
Кашф қилдим бир оят:
Бепардоз юриш — эрли
Аёл учун жиноят.

Созладим қош-кўзимни
Ботиб ширин хаёлга,
Бир соатда айландим
Кўҳликкина аёлга.

Тугаб қопти, ўлсин-а,
Атирларам бир қиммат!
Келинлардан сўрашга
Бўларкансан хижолат.

Омон бўлсин шу эрим,
Олдираман зўридан:
«Макс фактор», «Мери Кей»,
«Орифлейм» — ҳар туридан.

Қилиб кўйдим ораста
Сочу турмакларимни.
Янгилашим керак бир
Тунги кўйлакларимни.

Тақилди неча йиллар
Тақилмаган мунчоғим,
Гулдастанинг бўйига
Тўлиб кетди ётоғим.

Бу бир буюк кун эди,
Гадо еттандай тожга,
Мисоли расул каби
Юксалгандим меърожта.

Шу кун эрим ҳам гўё
Нур сочарди оламга.
Исо Масиҳдай бўлиб,
Кириб келди хонамга.

Мени кўриб, кўзлари
Катта-катта очилди.
Кўлидаги газета
Ерга тушиб сочилиди.

Назокат билан секин
Дедим: «Раҳмат гул учун».
Эримнинг кўзларидан
Сочилар эди учкун.

«Қимматдур?» деб ноз билан
Юзларимни ёпволдим.
Эрим деди: «Билмадим,
Йўлакчадан топволдим».

ГУЛДАСТА – 2

Юрагимнинг ўзига
Қизамиқ тошди дув-дув.
Кутмаганда, бошимга
Афдарилди қайноқ сув.

Чиқиб кетдим ётоқдан
Жоним сифмай танага,
Кирдим эримнинг катта
Расми бор хонага.

Ҳозиргина мен қандай
Бахтли эдим, шод эдим!
Эримнинг суратини
Қўлга олиб «дод» дедим.:

«Эркак бўлмай ер юткур,
Бетгинангни ел олсин!
Йўлакчадан топволган
Гулинг бошингдан қолсин!

Нима қиласдинг бузиб
Тинчгина ҳаётимни?
Унутиб бўлгандим-ку
Аёл деган отимни.

Меҳр кутган мен аҳмоқ!
Ўзимда эс қолмаган,
Гулдаста берармидинг,
Бир ғунчага олмаган!

Адо қилдинг куйдириб,
Қачон одам бўласан?!
Хотин бўлиб ўрнимда
Бир кун турсанг, ўласан!

Эркак — пир, деб соянгга
Солардим-а пояндоз,
Писмиқина бўлволиб,
Куйдиргансан, хотинбоз!

Унуганим йўқ кунда
Ичиб келишларингни,
Болаларим ризқини
Сочиб келишларингни.

Ўнгу чап юриб, алдаб,
Қанча қилгансан гаранг,
Ўлиб қолар эдингми
Яна битта алдасанг?!

«Ўзим олдим – сенга», деб
Туролмасмидинг бир пас?
«Йигирма минг сўм экан»
Демайсанми, ярамас?!

Шуям гул бўптими, бир
Бели боғлиқ супурги!
Ерда ётган нарсани
Нега олдинг, куйдирги?!

Танлаб, не йигитларнинг
Қоматини эгиб ман,
Одам қуриб қолгандай
Сен мумсикка тегибман!

Бир айланиб ёшликка
Қайтиб қолсам қанийди,
Сендан маҳалламдаги
Тешавой ҳам яхшийди.

Доим ҳайит-байрамда
Юради гул кўтариб.
Сен-чи, «Ўзинг олвол» деб
Келасан пул кўтариб.

Ураманми бошимга
Ўзим олган гулингни?!
Кўнглим чўнтақмидики,
Солиб юрсам пулингни.

Ювошгина бўлволиб,
Билмагандай турасан,
Эсон-омон тонг отсин,
Ажрашаман, кўрасан!

Айтгилигимни айтиб,
Юпаниб турсам энди,
Эрим ногоҳ уйқудан
Уйғониб туриб деди:

— Ётмайсанми, ким билан
Гаплашяпсан, аяси?
— Ҳа, йўғ, шу суратингиз
Зўр чиққан-да, дадаси.

Тавба, астағфуруллоҳ!
Худо олсин феълимни,
Бир гулни деб мен аҳмоқ,
Итдек қопдим эримни.

Суратини бўлса ҳам,
Қилдим анча беҳурмат,
Мен нодонда бари бир
Етмас экан маърифат.

Пешона-да, Марҳабо,
Нолимайин ҳеч кимга
Нима қиласай шундай эр
Тушган бўлса чекимга?!

Ётоқقا кириб гулни
Кучиб шипшидим аста:
Ҳамма-ҳаммаси учун
Раҳмат сенга, гулдаста.



ЭРИМ БИЛАН ДАМ ОЛДИМ

Үй-рўзгор ташвишлари,
Ҳоритиб кўйди бари,
Бориб сиҳатгоҳ сари,
Эрим билан дам олдим.

Мен — касал, у соғ эди,
Шундан вақти чоғ эди,
Ейиши гўшт-ёғ эди,
Эрим билан дам олдим.

Бир хонада икки жон,
У — меҳмон-у, мен — мезбон,
«Ош дамла, сол дастурхон!»
Эрим билан дам олдим.

«Телевизорни кўйиб бер!»
«Тарвузимни сўйиб бер!»
«Коса» қиб бер, ўйиб бер!»
Эрим билан дам олдим.

Ҳай-ҳай, бошланди футбол!
«Войдод, рақиб урди гол!
Тепмайсанми, югур, бўл!»
Эрим билан дам олдим.

«Алла айт, уйқум келди!»
«Ялла айт, тургим келди!»
Тутволиб ургим келди,
Эрим билан дам олдим.

«Қашлаб қўйгин орқамни!»
«Уқалаб қўй елкамни!»
«Қовуриб бер куркамни!»
Эрим билан дам олдим.

Рашк қиласи молдан ҳам,
Аталахўр чолдан ҳам,
Тойдим охир ҳолдан ҳам,
Эрим билан дам олдим.

Уйимдаги бу меҳмон,
Дардисари ғами жон,
Софайишим даргумон,
Эрим билан дам олдим.

Даволаниш қаёқда?!
Юриб бориб оёқда,
Қайтдим ҳасса-таёқда,
Эрим билан дам олдим.

Кўшним сўрайди: — Ҳай-ҳай!
Бўб қолибсиз калитдай
Нима бўлди, айланай?
— Эрим билан дам олдим.

УЙИМДАГИ «ШПИОН»

(шебърий эртак)

Гап тарқалди шаҳарга,
Айтсам сизга эртаклар,
Кувончидан осмонга,
Сакрар эмиш эркаклар.

Жаннатнинг боғларига,
Бошлармиш хаёллари.
Бу хабардан негадир,
Хафамиш аёллари.

— Нима гап? — деб сўрасам,
Бир эркак деди мамнун:
— Икки хотин олишга
Рухсат берилди бугун.

Ўн беш ёшли йигитдан,
Тўқсон ёшли чолгача
Бўб қолибди юришу
Туришлари бошқача.

Бўяганмиш Нўймончол
Оқ сочини қорага.
Қарамасмиш кампири
Шўрлик Жаннат холага.

Ўсал бир чол турганмиш
Кўзларида ёниб чўғ.
Айтар эмиш: Эндиям
Ўладиган жинни йўқ!

Тавба қилдим, тобутда
Кетётган эркак ўлик
Қабристонга боргунча,
Ўтирганмиш тип-тирик.

Келолмасдим анграйиб,
Бу хабардан ўзимга,
Бало кўриниб кетди
Эркак зоти кўзимга.

Муқаддас китобларда
Ўқигандим бир оят:
«Хотинларингиз ичра,
Қилолмассиз адолат».

Булар байрам қиляпти,
Үйламай бош-кетини.
Хотинлари сиқилиб,
Еса-чи ич-этини?

Зулм қилган бўлмасми,
Хотинларига оғир?
Зулмкорнинг манзили
Дўзах дейилган, ахир.

На илож, гарчи, бундан
Жонимга озор етди.
Уйга чопдим, эримни
Хурсанд қилгим кепкетди.

Чунки унинг бошданоқ,
Ниятлари чап эди.
Ўн йил олдин ҳам уни
Сайратган шу гап эди.

Оёқларим чалкашиб,
Уйга чопиб кетаркан,
Дедим: «Эрим, ниҳоят,
Орзусига етаркан.

Бу хабарни эшитиб,
Ёниб кетади кўзи.
Хотинни жуфт қилолмай,
Зўрга юрганди ўзи.

Энди менинг устимга
Лайлини олармикин.
Тушида номин айтган,
Хайрини олармикин?»

Уйга кирдим ҳаллослаб,
Айтдим, сабрим етмади.
Нимагадир у киши
Хурсанд бўлиб кетмади.

Кўчадаги эркаклар
Номард экан, қув экан.
Қувонмади меники,
Вафодори шу экан.

Аёллардан бир ўзим
Бахтли эдим оламда.
Айланайин эримдан,
Андишали одам-да.

У секин гап бошлади,
Кияётиб оқ дўппини:
— Бошлагандик қачонлар,
Энди рухсат бўбтими?

Бу гапдан сўнг юракда
Ўчиб қолди чирофим.
Илон экан ёнимда
Яшаб юрган ўртоғим.

Ё мен гўлман, бу ишни
Шу пайтгача билмабман.
Ё у тоза «ишлаган»,
Ҳатто, шубҳа қилмабман.

Эсим қурсин, шунчаям
Бўламанми содда, жўн.
Қандингни ур, оғарин,
Замонавий «шпион».

Кўзларимда ёш билан,
Тамом бўлди эртаклар:
Раҳмат сизга, рухсатни
Кутиб юрган эркаклар.



ГАП

Ўнта ўртоқ неча йил
Кўришолмас эдик бир.
Дийдор ҳам керак, ахир,
Ана гап-у, мана гап.

Софинишгандик чиндан
Гап ўйнадик юз мингдан.
Зап чиқдим-да уйимдан,
Ана гап-у, мана гап.

Фазалхонлик қиласиз,
Машрабхонлик қиласиз,
Эҳ, ўзимиз биласиз!
Ана гап-у, мана гап.

Эримга ҳам билдиридим,
Лойқа феълин тиндиридим,
Вой-вой зўрға кўндиридим,
Ана гап-у, мана гап.

Яшардим Янгиободда,
Йигин Юнусободда,
Тўрт автобус — тўрт патта,
Ана гап-у, мана гап.

Беш минг бўлди йўл кирам,
Ичим ачиди бирам,
Ўлсин шу ўтириш ҳам,
Ана гап-у, мана гап.

«Бер, бер», деб дуо қилдик,
Бандалик дъяво қилдик,
Шунда ҳам хато қилдик,
Ана гап-у, мана гап.

Кейин навбатма-навбат
Қилишиб сабру тоқат,
Сўрашдик икки соат
Ана гап-у, мана гап.

Бўлдик чой-у, ошланиб,
Кайфиятлар хушланиб,
Фийбат кетди бошланиб,
Ана гап-у, мана гап.

Турганлар ҳам қолмади,
«Юрган»лар ҳам қолмади,
Ўлганлар ҳам қолмади,
Ана гап-у, мана гап.

Мақтандик қай биримиз,
Үртандик қай биримиз,
Қолмади ҳеч сиримиз,
Ана гап-у, мана гап.

Кириб кетиб Тошкондан,
Тешиб чиқдик Анжондан,
Ош яхшиймиш лағмондан,
Ана гап-у, мана гап.

Қолмади нарху-наво,
Беҳуда сўз муддао,
Суҳбат ҳам бўлди расво,
Ана гап-у, мана гап.

Нодон эканмиз анча,
Қулайлик бўлса қанча,
Ношукурлик ҳам шунча,
Ана гап-у, мана гап.

Ниҳоят, ёқа ушлаб,
Артистлардан очдик гап,
Бўб кетдик тараф-тараф,
Ана гап-у, мана гап.

Номларин айтиб бир-бир,
Ахтардик тирнокдан кир,
Қилдик росаям «хузур»,
Ана гап-у, мана гап.

Суриштириб зотини,
Билдик нечта хотини,
Юлдик қанот-патини,
Ана гап-у, мана гап.

Кўйиб-кўйиб типпа-тик,
Бошдан оёқ қарадик,
Юз камчилик санадик,
Ана гап-у, мана гап.

Қилган фийбатимизга,
Юз гуноҳ ҳаммамизга,
Ёзилди номамизга,
Ана гап-у, мана гап.

Шўрлик ҳофиз болани,
Келган экан омади,
Гуноҳи ҳам қолмади,
Ана гап-у, мана гап.

Бир юз беш минг пул тўлаб,
Бир қоп гуноҳ орқалаб,
Кетдим уйимга қараб,
Ана гап-у, мана гап.

Маҳшарда ҳали у қоп,
Очиб, қилинса ҳисоб,
Ҳолим бўлади хароб,
Ана гап-у, мана гап.



ОНАМНИ КҮРГАНИ БОРАМАН

Йигит тилидан

Бозорга чиқибди қулупнай,
Етказди, Худодан айланай,
Илиниб, илиниб олволай,
Онамни күргани бораман.

Ишларим йўлимни тўсса ҳам,
Пойимда тиканлар ўсса ҳам,
Бир даста гул олиб бўлса ҳам,
Онамни күргани бораман.

Кирсам ҳам иккита нон билан,
Бағрига босади жон билан,
Айтади: «келингми, жон болам?»
Онамни күргани бораман.

Бўлиниб, ҳар ким ўз йўлига,
Ташладик келинлар қўлига,
Ялиниб яшар ўз ўғлига,
Онамни күргани бораман.

Кийиниб, оҳорли, саришта,
Бормайин эски, чанг ковушда
Сўзлайн энг майин товушда
Онамни күргани бораман.

Ичволиб, маст бўлиб бормайин,
Ҳайвондан паст бўлиб бормайин,
Хит қилиб юрагин ёрмайин,
Онамни кўргани бораман.

Ичига солиб ғам-ғуссасин,
Туққанига афсус емасин,
«Ўлсанг ҳам розиман!» демасин,
Онамни кўргани бораман.

Куйдирги фарзандин доғида,
Синмасин қариган чоғида,
Эъзозлай жонининг соғида,
Онамни кўргани бораман.

Ўтирай bemalol, ёзилиб,
Қолмасин ташвишim сезилиб,
Юрмасин юраги эзилиб,
Онамни кўргани бораман.

Айтмайин боламнинг ғамини,
Билдиримай рўзгорим камини,
Ўчирмай юрагин шаъмини,
Онамни кўргани бораман.

Акамнинг яххисин оширай,
Укамнинг айбини яширай,

**Кувнатиб меҳрини тоширай,
Онамни кўргани бораман.**

**Уй талаш-мол талаш қилмайин,
«Унга кўп, менга оз», демайин,
Бошини оғритиб келмайин,
Онамни кўргани бораман.**

**Эркалай: «Оймомам, ўзимни,
Кувнатиб турасиз кўзимни»,
Кулади эшитиб сўзимни,
Онамни кўргани бораман.**

**«Ҳаммадан гўзалсиз», деб атай,
Сўлиган руҳини яшнатай,
Кулдириб-кулдириб, яйратай,
Онамни кўргани бораман.**

**Нурланиб қайтаман ёнидан,
Куч олиб жисмию жонидан.
Кузатар кулиб, айвонидан,
Онамни кўргани бораман.**

**Ўшадир, Марҳабо, давлатим.
Энг гўзал фарзим-у суннатим,
Оёғин остида жаннатим,
Онамни кўргани бораман.**

КЕЛИНИМ КЕЛИН ОЛДИ

Келин бўлиб, сўйдирган,
Гап қайтариб, куйдирган,
Кетиб қолиб, тўйдирган,
Келиним келин олди.

Етти ёққа зир чопиб,
Чиройли бир қиз топиб,
Пешонасидан ўпиб,
Келиним келин олди.

Ниҳоят, у жонона,
Ўзи бўлди қайнона,
Келинига парвона,
Келиним келин олди.

Мақтанар: «Келин болам,
Чиройли ўзимдан ҳам,
Шаҳло кўз, қоши қалам,
Келиним келин олди.

Юзларидан ёғар нур,
Лаби фунча, тиши дур».
Дедим: «Ҳали шошмай тур»,
Келиним келин олди.

Фунча лаб бир очилсин,
Заҳарлари сочилсин,
Тифи жонга санчилсин,
Келиним келин олди.

Мушугини дегин «пишт»,
Чумчугини дегин «кишт»,
Ана қиёмат — уруш,
Келиним келин олди.

Шаҳло кўзлар ўқрайиб,
Ҳар кўргандада хўмрайиб
Найзасин турсин сайиб,
Келиним келин олди.

Чимирилиб қалам қош,
Юрагингни қилсин ғаш,
Вақтинча ўпиш, ялаш,
Келиним келин олди.

Ўзингдай идиш ювса,
Қолмайди бутун коса,
Чойнагинг тутар ҳасса,
Келиним келин олди.

Кўполлигидан уни,
Чангютгичми, дазмолми,
Бузилиб битар куни,
Келиним келин олди.

Уч кунлаб кир ивитсин,
Сочиқларинг чиритсин,
Бир кўнглингни совутсин,
Келиним келин олди.

Гап бермасдан ўзингдай.
Сайраб турсин булбулдай,
Томошангни бир кўрай,
Келиним келин олди.

Ўғлингга гап ўргатсин,
Ялласига ўйнатсин,
Бир кунингни кўрсатсин,
Келиним келин олди.

Бошлаб уйда талотум,
Овсинга қилса ҳужум,
Дейман: «Саломалайкум!»
Келиним келин олди.

Исроф қилиб борингни
Чайпасин рўзғорингни,
Шу қиз берсин додингни,
Келиним келин олди.

Энди биласан, мана,
Қайнона бўлиш нима,
Ажабгина бўлди-я,
Келиним келин олди.

Тавба, тавба, нима бу
Юрагимда кек, қайғу?
Ахир, уйимда тўй-ку,
Келиним келин олди.

Ўзинг кечиргин, Олло,
Инсон бўлмас бехато,
Шукур, деб, қилай дуо,
Келиним келин олди.

Ахир, унда ёш эди,
Йўнилмаган тош эди.
Беакл, бебош эди,
Келиним келин олди.

Секин гапириб, мақтаб,
Дуолар қилиб алқаб,

Йўлга солдим-ку алдаб,
Келиним келин олди.

Дедим: «Тежамкор болам,
Менга мададкор болам,
Ўргилай, онам-онам»,
Келиним келин олди.

«Кир ювар оппоқ-оппок,
Идишим ушлар юмшоқ,
Миннатдор коса, товоқ»,
Келиним келин олди.

Қилиб сабру-бардошни,
Кўздан оқизмай ёшни,
Пиширдим шу хом ошни,
Келиним келин олди.

Сабр қилди Марҳабо,
Ғўрадан битди ҳолво,
Энди қиласин дуо,
Келиним келин олди.

Ёмон келин дўзахдир,
Яхши келин жаннатдир.
Илоё, кўрсинг ҳузур,
Келиним келин олди.

«ХҮП-ХҮП»

Қайнона билан келин
Ногоҳ айтишиб қолиб,
Кетди ота уйига
Келин боласин олиб.

Жиринглади телефон,
Олди йигит онаси,
Қўнғироқ қилаётган
Ўғилнинг қайноаси:

«Ассалому алайкум,
Қудажоним, айланай,
Муллакамлар омонми?
Куёв ўғлоним қалай?

Болалар етиб келди,
Ўтиришибди, мана,
Гурунглашиб яйрардик,
Бирга келганингизда.

Набирангиз бир ширин,
Катта қилиб қўйибсиз,
Ёқимтойлигин кўринг,
Куйиб қўйган ўзингиз.

Куёв боламга ўхшаб
Ақл чиқар кўзидан,
Бобосига тортган-да,
Нур ёғилар юзидан.

Омон бўлинг баҳтимга,
Раҳмат сизга, қудажон,
Қизингиз гул-гул яшнаб,
Сиздан келтириди салом.

Нега келганин билдим,
Қўлимда «адаб чўпи»,
Ҳар нарсаси бормиш-у,
Тугаб қопти «хўп-хўп»и.

«Хўп-хўп»сиз қолган бўлса,
Қийнагандир сизни ҳам,
Сал бўлмаса хижолат
Қилас экан бизни ҳам.

Яхшиям жўнатибсиз,
Тахминимиз чин чиқди,
Кўнглига қўл солгандик,
«Кибр» деган жин чиқди.

Ҳозир ўша жинини,
Бўғибина ўлдирдик,
Қўйни-қўнжи, чўнтагин,
«Хўп-хўп» билан тўлдирдик.

Қиз узатган ҳовли-да,
Баланд-пастни кўрганмиз,
Томорқанинг барига,
«Хўп-хўп» экиб қўйганмиз.

Уй-жойимиз «хўп-хўп»дан,
«Хўп-хўп»дан сув, нонимиз,
Баъзида шу «хўп-хўп»нинг,
Кўлидадир жонимиз.

Фарам қилганмиз уйга,
Ўша «хўп-хўп»ни териб,
Жўнатамиз қизларга,
Уч-тўрт тугунни бериб.

Болаларингизни ҳам,
Кудангиз олиб кетди,
Тўрт қоп «хўп бўлади»ни,
Мошинга солиб кетди.

Сиз – устоз, у – талаба,
Ҳар юмушни ўргатинг,
«Хўп-хўп»и тугаб қолса,
Дарров менга жўнатинг».

Эй келин! «Хўп» деган сўз,
Уч ҳарфдан тузилган,
Аммо унинг важидан,
Канча уйлар бузилган.

Доно бўлсанг «хўп-хўп»ни,
Бошингдаги «тож» деб бил,
Агар баҳтли бўлмасанг,
Марҳабо холанг кафил.



КҮРПАЧА

Бир авлиё — Роҳила,
Яшар эди кулбада,
Иш-юмуши — ибодат,
Кўрпачаси увада.

Бир кун дедилар унга,
— Кўрпачаларинг жулдур,
Биз бир бойни биламиз,
Янги қилиб берадур.

Роҳила деди силаб,
Увада кўрпасини:
— Сиз кўрган нарсаларни,
Аллоҳ кўрмаяптими?

Ҳар иш бўлса Ўзидан,
Ўзидан кўп-озимиз,
Аллоҳ рози бўлганга,
Шукур, биз ҳам розимиз.

Роҳилага ҳайронман,
Қилмайдими уй-рўзгор,
Ёлғиз аёл кишига,
Тофу тошда нима бор?

Ўрнида бўлганимда,
Тегиб бир яхши эрга,
Бекалик қиласар эдим,
Катта бир ҳовли, уйга.

Ўстирадим фарзандлар,
Ўпиб, қучиб, пўпалаб,
Яшар эдим эримнинг,
Оёғини уқалаб.

Болалар катта бўлса,
Совчи кут, тоғора қил,
Энг буюк вазифам шу,
Карнаю ноғора қил.

Қилмасанг бўларканми?!

Элу юрт, урфу одат,
Аёл кишига шунинг
Ўзиям зўр ибодат.

Уйда йиртиқ кўрпача!
Вой, шўрим курсин мени,
Ундан кўра елкамдан,
Олиб ташланг калламни.

Совчи келиб қолса-чи,
Шу аҳволимга ҳозир,
Бахмал олиб берворсин,
Югур, отангга югур.

Эрим: «пул йўқ», десин-чи,
«Топасан!», деб қўймайман,
Уйимнинг шу камини,
«Ёпасан», деб, қўймайман.

Топмасин-чи «дод», дейман,
Ўзи яхши билади,
Заплайман, керак бўлса,
Малайлик ҳам қилади.

Кўрпачамни душманга,
Эланиб ҳам бутлайман,
Керак бўлса шайтондан,
Тиланиб ҳам бутлайман.

Не қилсам қиласанки,
Уйимда ризқ, қут бўлсин,
Болаларим қорни тўқ,
Ва кўрпачам бут бўлсин.

Роҳила меърожига,
Булут сузиб етмайди,
Дунё қўл чўзса, унинг
Ковушига етмайди.

Шунинг учун мен бу — мен,
Синиқ, майда Марҳабо,
Роҳила бу — Роҳила,
Яхлит, буюк авлиё.

Юксалмас ҳаёт йўлинг,
Минг текисла жўвада,
Кўрпачанг бут бўлса-ю,
Қалбинг бўлса увада.



НОШУКУР

«Мен бойманми, камбағал?»
Бир одам берди савол.
Расулуллоҳ дедилар:
— Уйингда нима аҳвол?

Қайнайдими қозонинг?
Кунинг қандай ўтади?
Уйингдаги емишинг,
Неча кунга етади?

— Уч кунлик овқатим бор,
Деб, у киши олди тан,
Расулуллоҳ дедилар:
— Унда сен — бойлардансан.

Ўйлаб қолдим: Мен кимман?
Етарли ҳар буюмим,
Кўплигидан йиртилмас,
Ўн йилда ҳам кийимим.

Емишнинг бир ойлигин,
Йифиб, ғамлаб қўйганман,
Ёз мевасин қайнатиб,
Қишига дамлаб қўйганман.

Тўй-тўйчиғим ўтмайди,
Бекарнай, беноғора,
Меҳмон кутсам етмайди,
Ўттиз бешта тоғора,

Ўлим бўлса, кўк кийиб,
Бир йил аза тутаман,
«Уч», «Етти», «Йигирма» деб,
Тўйдай меҳмон кутаман.

Меҳнат билан пул топиб,
Битта тўйда сочаман,
«Етмаяпти», деб яна,
Ҳасратимни очаман.

Ҳаёт бўлганларида,
Расул алайҳиссалом,
«Мен бойми ё камбағал?»
Дея сўрасам савол,

Деган бўлар эдилар:
«Бурнинг ерга ишқалгур!
Сенинг отинг — Исрофгар,
Сенинг отинг — Ношукур».

ДАМ ОЛГАНИ БОРАМАН

Уй тўла бола-чақам,
Юрагимга керак дам,
Шукур, чиқди нафақам,
Дам олгани бораман.

Ҳеч нимага ишлатмай,
Бир боламга ушлатмай,
Соғлигим учун атай,
Дам олгани бораман.

Бошқалардан нейим кам?!

Икки юз минг нафақам,
Ўн кунгина бўлса ҳам,
Дам олгани бораман.

Рангим қолди синиқиб,
Қовоқларим димиқиб,
Келайин бир тиниқиб,
Дам олгани бораман.

Учта болам — учта ғам,
Ҳали у, ҳали бу кам,
Бир яшашсин менсиз ҳам,
Дам олгани бораман.

Нотинч қизим рўзгори,
Эри нобоп, безори,
Эзди шунинг озори,
Дам олгани бораман.

Ўтирайми ғам ютиб,
Юрак ўйногим тутиб?
Ҳаммасини унутиб,
Дам олгани бораман.

Четга суриб гуссани,
Белга тугиб «пенса»ни,
Қошга қўйиб ўсмани,
Дам олгани бораман.

Келинлар пиширди нон,
Олдим сочиқ, дастурхон,
Бир яйрасин кўйган жон,
Дам олгани бораман.

Ўсма қолмасин,вой-вой,
Райҳон, жанбил, «Авеер чой»,
Бир чўмилай бўлса сой,
Дам олгани бораман.

Олдим совуну, атир,
Хатто, чивинга раптор,
Чилвир олдим ювсам кир,
Дам олгани бораман.

Кўшнилардан айланай,
Ҳажга кузатишгандай,
Киришади пайдар-пай,
Дам олгани бораман.

Бири майиз обчиқди,
Бири асал собчиқди,
Тўлғазиши қопчиқни,
Дам олгани бораман.

Жойлаётсам чой, тузим,
Келиб қолди-ку қизим,
Мақтандим ёниб кўзим:
«Дам олгани бораман»!

Қизим сўради мендан:
— Пул келди қай одамдан?
— Давлат, деган «отамдан»!
Дам олгани бораман.

— Тавба, тавба! — деди у,
Юзида ёниб кулгу,
— Отангиз ўлганди-ку?!

— Дам олгани бораман.

Бу «отам» ҳеч ўлмайди,
Мени ташлаб қўймайди,
Ҳар ойда бир йўқладайди,
Дам олгани бораман.

Туққан боланг ҳам қайдиа,
Пул юборар ҳар ойда?
Ўша «Отам»дан фойда,
Дам олгани бораман.

Қанча болам бўлмасин,
Қанча суяб, суймасин,
Шу «отам»дан қўймасин.
Дам олгани бораман.

Қизим пўнғиллаб деди:
— Куёвингиз юборди,
Пул керак бўлиб қолди,
— Дам олгани бораман.

Дедим: «Эринг ичади,
Пул бердингми, сочади,
Шу сафар тинч кўй мени
Дам олгани бораман».

«Отам» деган: «Ишладинг,
Катта-катта тишлагин,
Соғлигингни тиклагин.
Дам олгани бораман.

Деди: «Пулсиз борсам гар,
Жанжал қиласи баттар,
Борарсиз бошқа сафар...»
Дам олгани бораман.

Туриб олди «Беринг» деб,
«Қайтарамиз, келинг», деб,
Үлади шу эрин деб,
Дам олгани бораман.

Дедим: «Сенга борлигим,
Тириклигим, соғлигим,
Керакмасми, жон қизим,
Дам олгани бораман.

У деди: «Нима қилай?
Пешонам бўлса шундай?!
Ё пул беринг, ё ўлай!
— Дам олгани бораман.

Шу эрингнинг дастидан,
Кутулмадим асти ҳам.
Одамдай қачон мен ҳам,
Дам олгани бораман?

Сенга шу пулми, ма ол,
Эрингта ёпишиб қол!
Кейин мен ҳам бемалол,
Дам олгани бораман».

Қиз пулни олиб кетди,
Чўнтакка солиб кетди,
Ҳамма иш қолиб кетди.
Дам олгани бораман.

Осмонга қараб сокин,
Юм-юм йифладим секин:
Falvasiz жой бормикин?
Дам олгани бораман.

Йигладиму юпандим,
Мана, ўтди бир куним,
Яна келади пулим,
Дам олгани бораман?

Нега қиласман «оҳ-воҳ»
«Отам» бор бошда паноҳ
Шу сафар, иншооллоҳ
Дам олгани бораман.



МЕН ЯШАЙМАН

Йиғлаб қолди бемор бояқиши,
Бир ойгина умри қолғанмиш,
Дедим: «Ўша дўхтирга дeng «Киш!»
Мен яшайман, худо хоҳласа».

Дейишса ҳам «дардинг бедаво»,
Айтинг: «Жоним эгаси Аллоҳ»,
Денг: «Ноумид бўлмайман асло,
Мен яшайман, худо хоҳласа».

Пичоқ тиқиб, ковласа оғриқ,
Бўлиб қолсам қоқсуяқ, ориқ,
Гуноҳларимдан бўлиб фориф,
Мен яшайман, худо хоҳласа.

Дерлар, гуноҳга — ғам кафорат,
Дард, ташвишли ҳар дам — кафорат,
Бунга саҳиҳ ҳадис кафолат,
Мен яшайман, худо хоҳласа.

Вужудимда бу дардим меҳмон,
Сийлаш керак меҳмонни мезбон,
Кузатаман ютсам ҳамки қон,
Мен яшайман, худо хоҳласа.

Яқинларим кўзи тўла фам,
Дилларида изтироб, алам,
Дегим келар «ташвишми, шу ҳам»
Мен яшайман, худо хоҳласа.

Бирор ҳаққин еб юрсам куйинг,
Ёлғон-яшиқ деб юрсам куйинг,
Иймоним бор қувонинг, қулинг,
Мен яшайман, худо хоҳласа.

Битта ётган касал ўлгунча,
Кетиб қолар соғлардан қанча,
Бу дунёда ишларим шунча,
Мен яшайман, худо хоҳласа.

Бир ой бўлса, бир ой-да, ўртоқ
Шу вақтга ҳам шукур, беадоқ,
Мумкин қанча яхши иш қилмоқ,
Мен яшайман, худо хоҳласа.

Ўттиз кунда ўттиз минг дона,
Айтиш мумкин тасбеҳ, шукрони,
Вақтингизни чоф қилинг, она,
Мен яшайман, худо хоҳласа.

Ака, ука, жигар, дўст, янга,
Сизларни ҳам қийнаб қўйдим-а,

Рози бўлинг хизматингизга,
Мен яшайман, худо хоҳласа.

Фақат кўрқманг сал чўчитворсам,
Кўзим юмиб индамай қолсам,
Бўлиб сокин, бедарду, бегам,
Мен яшайман, худо хоҳласа.

Буни ўлим деманг, илтимос,
Инсон яна тирилмоғи рост,
Бу вақтинча сукунат, холос,
Мен яшайман, худо хоҳласа.

Муҳими шу: гарчи bemорман,
Fam-azobdan tunlar bedorman,
Шу лаҳзада тирикман, борман,
Мен яшайман, худо хоҳласа.

Дард баҳона тозаряпман, деб,
Озсам, бўйга узаряпман, деб,
Борган сари тузалияпман, деб,
Мен яшайман, худо хоҳласа.

Мусибатдан ўчса ҳам ҳуши,
Яшаш керак умид-ла киши,
Ноумидлик шайтоннинг иши,
Мен яшайман, худо хоҳласа.

АФЛОТУННИНГ «ХОТИНИ»

Эрим деди: — Ишонсанг,
Бир дўстимга қарз бердим,
Қарз бердиму, ҳам пулим,
Ҳам дўстимдан айрилдим.

Бу йил ўн йил бўлади,
Чопа-чопа толдим мен,
Эшигига пул сўраб,
Беш юз марта бордим мен.

Хотинининг олдига,
Аяси, сен, бориб боқ,
Дедим: — Билинг, дунёда,
Энг зўр савоб — қарз бермоқ.

Жаннатнинг эшигига
Ёзилганмиш бир ҳисоб:
«Садақага — ўн савоб
Қарз берганга юз, савоб».

Ҳикматларда: «Қарздорни
Бойигунча кут, деган,
Фақир бўлса, қистамай,
Қарз баҳридан ўт, деган».

Эрим деди: — Ҳозир бой,
Пулни бермайди, номард,
Машина, ҳовли олиб,
Уй солди қават-қават.

Қўрқиб кетдим: — Ё, тавба!
Бу қандайин жаҳолат?
Ўлса шунча қарз билан,
Охирати — ҳалокат.

Бордим ўша одамнинг,
Сўраб, уй-маконига.
Тушунтиридим, ўтириб,
Хотинининг ёнига:

«Айланайин, ўртоқжон,
Эр — пошшо, биз — вазирмиз.
Киролмаймиз жаннатга,
Турса шунча қарзимиз.

Қарздор қарзин узмаса,
Бўлиб туриб имкони.
Қабул бўлмайди, ҳатто,
Килган хайру эҳсони.

Сиз эса, уй қурибсиз,
Машин олибсиз, мана,
Қарз узишнинг ўрнига
Тўй қиласиз яна.

Биламан, ожизамиз,
Эрга етмас кучимиз.
Аммо ҳар не қилиб ҳам,
Йўлга солмоқ бурчимиз.

Болам-чақам, деб юрар,
Шўрлик эр, не қилмасин.
Секин айтинг акамга:
Охирати куймасин».

Қайтдим. Дедим эримга:
— Бошқа сўраманг қарзни
Хотинига етказиб
Кўйдим суннату фарзни.

Обкелмаса, қайғурманг,
Бўйнида қарз жавоби.
Қай чўнтакда юрмасин,
Сизга шу пул савоби.

— Ўзим яхши эканман,
Деди, эrim, кўнгли тўқ,
— Ўйлаб кўрсам бирордан,
Ўн беш тийин қарзим йўқ.

Машинам бор, уйим бор,
Бор мармардан ҳовузим,
Ҳовлимда савлат тўкиб,
Юрап бир жуфт товусим.

Мен дедим: — Шошмай туриңг,
Ҳисоб-китоб қилишми?!
Олдим тўлов қофозлар
Соладиган идишни.

Дедим: — Қарзиз чироқдан,
Иссиқ сувдан тўққиз минг,
Зангор олов тўрт ойга,
Ўн беш минг мулла жириңг.

Уч-тўрт марта қатнади,
Шўринг қурғур тўрт ходим,
«Кейинги ой бераман»,
Деб, қутуласиз доим.

У деди: — Тўй қиляпман,
Вақтим йўқ бош қашлашга,
Дедим: — Кафолат борми
Яна бир ой яшашга?

Чироқсиз бир яшанг-чи,
Қоронгуда қоласиз,
Ювинмай юришга-чи,
Қанча чидай оласиз?

Эрим деди: — Бир юртда
Сув, чироқ эмиш текин.
Дедим: — Улар ўз юртин
Таласа, талайверсин.

Ниманики хор қилсак,
Ўшанга бўламиз зор.
Ҳисобли дўст айрилмас,
Деган, мақоллар ҳам бор.

Бемалол ишлатяпсиз,
Олишда олар жоним.
«Тўла» деса, қочасиз
Беришда чиқар жоним.

Гүё бу неъмат, шундоқ
Ариқчада оқади.
Үйланг, бундан қанча жон,
Бола-чақа боқади.

Бу ҳам қарз-ку, бермасдан,
Судраб юрсангиз яна,
Қанча одам вақтида
Ололмайди мояна.

— Ўлиб кетаяпманми,
Турасан шунча заплаб?
— Қалай экансиз?! — дея
Узокдан бошладим гап:

— Дор ўйнаб қўрганмисиз?
Ўйнайсиз ҳали, шошманг,
«Нима, мен дорвозмидим»,
Дея, тутоқиб шошманг.

Ҳали бир дор ўйнаймиз,
Пулсиrottинг устида,
Харидор бўлиб дўзах,
Чапак чалар остида.

Дунё яшалиб, эскиб,
Сўнгти куни келган дам,
Биронта ҳам қолмайди,
Дорга чиқмаган одам.

Бунда дорбоз йиқилса,
Тушади ерга шундок,
У дор ости – жаҳаннам,
Оловли катта ўчоқ.

На чекиниб, на қочиб,
Бирон қилиқ қиб кўринг,
«Бор, чиқмайман дорингга,
Дорвозмидим», деб кўринг.

«Чув туширдим, бопладим»,
Деб, қилган бўлсак роҳат,
Энди ўша қил йўлда
Кўрсатамиз маҳорат.

Илдам, чопиб ўтади,
Инсофли фақирми, бой
Ўғри, судхўр, ҳаммадан,
Қарздорларнинг ҳоливой.

Уларга минг йиллик йўл,
Тайёрага чиқолмас,
«Фордми», «Мерседес», «Тико»
Сайёрага чиқолмас.

Бу йўлда манзилингта,
Киракашлар элтмайди,
Бунда «Боинг» ва ҳатто,
Ракетанг ҳам кетмайди.

Ўрнимга ўтиб бер, деб,
Ёллаёлмайсан киши.
Бу ҳар ким, ҳар бир жоннинг.
Ҳақиқий шахсий иши.

Бирор мадад, ёрдам йўқ,
Ҳар ким ўзи ўтади,
Шунда қарздорнинг қарзи
Оёғидан тутади.

Эрим қўрқиб деди: — Бас!
Пулни олу, даф бўлгин,
Газми, сув, чироғингта,
Тўлагину «хап» бўлгин.

Тек қўйса, эринггаям,
Панд-насиҳат қиласан,
Афлотуннинг «хотини»,
Ҳар балони биласан.

— Ислом тамаддунининг
Марказида яшаб ҳам,
Ўлибманми, Бухорий
Ҳадисларин билмасам?!

Қарзни тўладик, бизга
Марҳамат қилди Аллоҳ,
Пулсирот балосидан,
Кутулдик, иншооллоҳ.

Энди қурбонлик учун
Битта қўзи олайлик,
Эрим деди: — Динозавр
Сўйиб қўя қолайлик.

Кула-кула, пишириб
Қўшниларга шу куни
Холвайтар тарқатдим мен —
Афлотуннинг «хотини».

«Дардинг бўлса бўлсину,
Аммо қарзинг бўлмасин»,
Дея матал тўқиган
Донишмандлар ўлмасин.

ҚЎШНИЛАР ҲАҚИДА РИВОЯТ

Бой билан мискин киши
Қўшни эди бир замон,
Бир-бирларига доим,
Оқибатли, меҳрибон.

Ҳатто, болалари ҳам,
Бирга эдилар ҳар чоқ,
Гоҳ у, гоҳ бу ҳовлида,
Ўйнашиб қувлашмачоқ.

Бой биларди, қўшниси,
Яшарди камтар, юпун,
Дастмояси — бир арқон,
Териб сотарди ўтин.

Не бўлар ўтин пули,
Ахир, уйда саккиз жон?!
Бой камбағал қўшнига,
Қилиб турарди эҳсон.

Бой ўйларди: «Болалар
Гоҳида урушганда,
Берган нарсаларимни,
Қилмасинлар писанда».

Ҳеч бир жонга билдиrmай,
Ул, бул олиб бозордан,
Киргизиб туар әди,
Бегона хизматкордан.

Үйларди: «Ҳар нарсамда,
Ҳаққи бор қўшнимнинг ҳам,
Топганимни у билан,
Кўришим керак баҳам».

Бойнинг ёрдами билан,
Қутга тўлиб айвони,
Ўтинчининг ҳар куни,
Қайнар әди қозони.

Ўтинчи бу эҳсоннинг
Кимданлигин биларди,
Дастурхонда пинҳона,
Бойни дуо қиласади.

Бир куни бой иш билан,
Узоқ бир юрга кетди,
Ё Қашқар, ё Мисрга,
Ва ёки Туркка кетди.

Сафари сал чўзилиб,
Ўзга юртда қолди бой,
Чарчаб қайтди уйига,
Бўлганида олти ой.

Хотинига «обқўй» деб,
Ақча берди халтада,
Деди: «Бу Ҳажнинг пули,
Жўнайман шу ҳафтада».

Хотинидан сўради,
Ечаётиб маҳсини:
— Тинчликми маҳаллада?
Кўни-қўшни яхшими?

Ўтинчи қўшни қалай?
Болалари омонми?
Хотини деди: — Яхши,
Бунча койитманг жонни.

Бир қизчаси ўлганди,
Қабристонга элтишди,
Шундан кейин негадир,
Бирдан бойиб кетишди.

Ўғлингиз кирган экан,
«Бу ёқقا кел», демабди,
Еяётган гўштидан,
Бирон тишлам бермабди.

Болам егиси келиб,
Йиғлаб кирди уйимга,
Ўшандан бери ўйлаб,
Етолмайман ўйимга.

Мўъмин одамнинг, ахир,
Бўлмасми қўли очиқ?
Қўшнингиз бойиб кетгач,
Бўлиб қолди қизганчиқ.

Бой шод бўлди, ҳарқалай,
Ўтинчи оч қолмабди,
Аммо гўштни боладан,
Кизғангани бўлмабди.

Бой сафардан қайтганин
Ён қўшниси билди-ю,
Зиёрат қилиш учун
Бойникига чиқди у.

Саломлашиб, ўтириб,
Сұхбатлашғандан кейин,
Бой деди қўшнисига:
— Бир гапим бор, айтайин.

Гўшт еб турган экансиз,
Кирган экан ўғилчам,
Хафа бўлибди унга
Бермапсиз бирор тишлам.

Ўтинчи дебди: — Узр,
Эй, қўшнижон, айб менда,
Бир ой жуда қийналдик,
Сиз сафарда юрганда.

Ўзим бетоб бўлгандим,
Ҳаловатим бузилди,
Оч қолдик, бир қизчамнинг,
«Нон», деб жони узилди.

Бир неча кундан кейин,
Қўлимда арқон билан,
Далага чиқдим, уйга
Зора қайтсан нон билан.

Ҳаром ўлган бир эшак,
Чиқди шундоқ йўлимдан,
Болаларимни эслаб,
Бир гап ўтди кўнглимдан:

«Очликдан ўлди қизим,
Хотиним ҳам ўсалдир,
Эй, Аллоҳ! Энди бизга
Бу ўлакса — ҳалодир».

Олиб келдим уйимга,
Шу эшакни нимталаб,
Тузлаб қўйдим бир хумга,
Гўштни бурда-бурдалаб.

Ҳаромлигин билганда,
Ўғлингиз «гўшт» демасди,
Бизга ҳалол эди-ю,
Сизга ҳалол эмасди.

Очликдан болаларим,
Бўлди суюгу, тери,
Емишимиз ўша гўшт,
Мана, бир ойдан бери.

Кўшнисин кузатди-ю,
Бойдан чиқди иситма:
«Сафарга бормай ўлай,
Нима қилиб қўйдим-а?!

Шуларга ташлаб кетсам,
Егулик бўлмасмиди,
Оч қолмаганда, балки,
Қизалоқ ўлмасмиди.

Ўлакса еб ўтиrsa,
Очликдан қўшним мени,
Каъбада Ҳажу, Умра,
Қилишимдан не маъни?»

Бой Ҳаж пулин чиқариб,
Ўтингчига тутқазди,
Болаларин ҳам унинг,
Атрофига ўтқазди.

«Лаббайка», деб Каъбанинг,
Қилгандай тавофини,
Етти марта айланди,
Уларнинг атрофини.

Уч кундан сўнг ҳожилар,
Кетишди Ҳаж қилгани,
Кетишди Аллоҳ учун,
Мол, жонин харж қилгани.

Уч ой деганда, бир-бир,
Қайтиб келди ҳожилар,
Дўконда бойни кўриб,
Ҳайрон бўлишди улар:

— Ҳожим, Каъбатуллоҳдан,
Қачон қайтиб келдингиз?
Қанот чиқдими ёки
Шамол бўлиб елдингиз?

Ахир, айтгандингиз-ку:
«Ўн-ўн беш кун қоламан,
Сизлар бораверинглар,
Сиздан кейин бораман».

Биздан бервортандингиз,
Совға-саломли тугун,
Элтиб бермоқчи эдик,
Уйингизга шу бугун.

Бой ҳайрон, дерди: — Ахир,
Борганим йўқ, Ҳажга ман.
Ҳожилар унинг сўзин,
Олишмасди асло тан.

— Ахир, Каъбатуллоҳни,
Бирга тавоф қилдик-ку,
Намоз вақтида беш вақт,
Ёнма-ён ўтирдик-ку.

Ёлғон арафа куни,
Етиб бордик Минога,
Арофатда ўтириб,
Хитоб қилдик Аллоҳга.

Дуо қилиб ўпдингиз,
Ҳажарул асвадни ҳам,
Бирга қурбонлик қилдик,
Бирга қирқдик сочни ҳам.

Ҳожим, омонатингиз,
Мана, тугунни олинг,
Йўлда чарчаб қолибсиз,
Биз кетдик, яхши қолинг.

Бой йиглар эди фақат,
Тилига сўз келмасди,
Кўлида тугун, унда,
Не борлигин билмасди.

Бой тугунни бағрига,
Босди-ю, чопди уйга,
Кўриб турган одамлар,
Бари эргашди унга.

Фаришталар туккан бу,
Тугунда не, ё, Аллоҳ,
Жойнамозми, китобми,
Либосми, ё тўтиё?

Уйга кирди, юраги,
Питирларди мисли куш,
Тугунни очса, заррин
Ҳарфли қора – Каъбапўш!

«Аллоҳу акбар»! дея,
Йиглаб қилди муножот:
«Бир гуноҳкор бандангта,
Робим, бу не иноят?!

Ахир, нодонлигимдан,
Сўлдирдим гул фунчасин,
Бўйнимда-ку уволи,
Ён қўшнимнинг қизчасин».

Бой йигларди «Кечир» деб,
Не қиласин билмасди,
Ҳожи бўлдими, бунга,
Ишонгиси келмасди.

Аллоҳ бир фариштани,
Ўхшатиб қўйиб бойга,
Туширган бўлса не тонг,
Ҳожилар турган жойга.

Бой тусида фаришта,
Бажариб Ҳаж амалин,
Берган бўлса не ажаб,
Совфали тутунчагин.

Мушки анбар исига,
Тўлди бойнинг ҳовлиси,
Йигилди узоқ-яқин,
Ва ўтинчи қўшниси.

Бой деди: «Эй яхшилар!
Кўп эди каму-кўстим,
Мени Ҳажга юбориб,
Ҳожи қилган — ён қўшним».

Бой қўшнисин қучоқлаб,
Одамларга билдириди,
Қўшни томон деворга,
Каъбапўшни илдириди.

Кўзга суриб одамлар,
Ўпдилар Каъбапўшни,
Ҳақ наздида шунчалар,
Азиз эканми қўшни?!

Ўша куни тиниқиб,
Ҳожи — бой қолди ухлаб,
Тушида Каъба ўзи,
Келганмиш уни йўқлаб.

Бойни ўтқазиб қўйиб,
Бармоғига деб «Сана»,
Атрофига етмиш бор,
Айланётганмиш Каъба.

Хуллас, Иброҳим қурган,
Каъбани ким билмайди?
Бу тош уйда Ҳақ ўзи,
Истиқомат қилмайди.

Ана байт, ана Каъба,
Қодир бўлсанг чоп, югур,
Аллоҳ ўзи қурган уй
Мўъминларнинг қалбидир.

Уларга бир назар сол,
Бири турар нурланиб,
Илму маърифат ила,
Тўлиб-тошиб, ҳурланиб.

Бири илмсизликдан,
Қоп-қоронғу, шипшийдам,
Бирида фаҳш, зинога,
Даъват қилади шайтон.

Сизни шу Каъбаларга,
Чорлайман эй, ҳожилар,
Ҳаммамиз йифилишиб,
Қиламиз катта ҳашар,

Ким маблағи, ким кучи.
Ким илм билан келсин,
Ким хунар, ким ширин сўз,
Ким билим билан келсин.

Бу уйни тиклаш Каъба
Тиклаш билан баробар,
Ҳожиликни, шу қутлуг
Уйдан бошланг, биродар!



ДУГОНАЛАР ҚИССАСИ

Нигора-ю, Наргиза,
Ва Раъно учта ўртоқ,
Синфдошлар ичидা,
Эдилар жуда иноқ.

Улғайишгач, айланиб
Палахмоннинг тошига,
Раъно тушди тошкентлик
Битта қариндошига.

Нигора-ю, Наргиза,
Қолишиди Андижонда,
Бир-бирларин кўролмай,
Юришарди армонда.

Уларнинг орасида,
Гўзали эди Раъно,
Шундай қиз тушган йигит,
Чиқди ароқхўр, бало.

Бир ёғи мусофирилик,
Келмади ҳеч омади,
Эри сотиб ичмаган
Тўшаги ҳам қолмади.

Қизларин бўйи етган,
Ажрашайин деса шарт,
Шу ҳолига Раънога,
Илашибди ёмон дард.

Яхши ҳам бор телефон,
Гаплашар уч дугона,
Энди нима қиласи,
Шўрлик Раъно бечора?

«Операция мумкин,
Аммо хавфли, кам қонинг,
Бир миллион ақча керак,
Сақлаб қолиш-чун жонинг».

Дўхтирларнинг гапидан,
Унинг кўнгли бўлди кир,
«Қаердан пул топаман,
Ўларканман барибир».

Бу хабарни эшишиб,
Дугоналар йиглашди,
Наргиза Нигорани,
Чақирволиб кенгашиб.

— Қандай қараб турамиз,
Сўнса шундай ойимиз?!

Синфдошлар ичида,
Йўқми бирор бойимиз?

Наргиза деди: «Бор-ку,
Лайли билан Ойзода,
Тилла олиб сотади,
Иккиси ҳам бозорда».

Кўнгил қашшоқ бўлса-чи,
Бўлган билан бойлик, пул,
Бир синфда ўқиган,
Олти ўртоқ, олти хил.

Улар: «Бор пул савдода»,
Деб баҳона айтишди.
«Аллоҳ раҳмини есин»,
Дейишди-ю, қайтишди.

Нигора деди йиғлаб:
— Каердан пул топамиз?

Наргиза деди: «Менинг,
Узугимни сотамиз.

Беш юз минг пул бўлади,
Бор, ана, уни сотдим».
— Эринг сўраб қолса-чи?
— Дейман, «уни йўқотдим».

Нигора деди: — Раъно
Менинг ҳам бир жигарим,
Мен ҳам шоҳонагимни,
Келаяпти «йўқотгим».

— Никоҳ узугингни-я?
Мумкин эмас, бунака.
— Шу узугим Раъононинг
Бош-кўзидан садақа.

Наргиза деди: — Тўхта!
— Ундей қилма, ўртоқжон,
— Агар шундай қилмасам,
Йифилмайди бир миллион.

Шу бугун шу узукни.
«Йўқотаман», албатта,
Бундан зўрин Аллоҳим,
Насиб қилсин жаннатда.

Узукларнинг нархини,
Ерга уришиб тоза,
Сотовлишди бозорда,
Лайли билан Ойзода.

Шу кун йўл мошинада,
Раънога нақд «гул» кетди,
Бир халта олма-туршак,
Ва бир ўрам пул кетди.

Хабар қилишди, Раъно
Чиқиб турди йўлига,
Кирақаш Раҳматилло,
Элтиб берди қўлига.

Хабар келди: «Нарсани,
Олдим Раҳматиллодан,
Агар мендан қайтмаса,
Қайтсин сизга Аллодан».

Дугоналар хурсанд, шод,
Чехралари яшнайди,
Дейишар, иншооллоҳ:
«Раъно энди яшайди!»

Севинчдан йиғлашди ҳам,
Йўлда икки дугона,
Келиб қолди икки «бой»
Лайли билан Ойзода.

— Қаранг, бу жинниларни,
Дея, улар кулишди,
— Узугидан айрилиб,
Йиғлаб ўтиришибди.

Шу куни бу дунёда,
«Софлар» жуда кўп эди,
Аммо шу «жинни»лардан,
Бахтироғи йўқ эди.

Узуги «йўқолган» кун,
Кувноқ эди Наргиза,
Эри деди: «Пул йифиб,
Зўрға олган эдинг-а!»

Нигоранинг эри лол,
Нурга тўлганди олам,
«Шунча хурсанд юрарми,
Узук йўқотган одам?..»

Шу кун жаннат эшигин,
Ким очди-ю, ким ёпди?
Маҳшаргоҳда билинар,
Ким йўқотди, ким топди?



«ДАРАХТЛАР»

Йифлаб сўз бошлади бир аёл,
Тикволиб кўзимга кўзини,
Кошки бир доно гап айтолсам,
У шўрлик юпатса ўзини.

У деди: «Мен ҳам бир аёлман,
Мен ҳам бир хонадон келини,
Илоҳий ҳикмат бор: Аёллар
Ҳаромдан сақлайди эрини.

Турмушга чиқдиму, «Пирим», деб
Эримнинг қўлини ушладим,
Муҳаббат тахтига ўтқазиб,
Кулдайин хизматни бошладим.

Тутардим пок, шинам, озода,
Уйиму боламу, жисмимни,
Мен фақат уни деб яшадим,
Унутиб ўзимнинг исмимни.

Пардозли юрардим туну кун,
Мизғирдим бир лаҳза кечаси,
Олдимда «бурнини тортарди»
«Мен» деган японнинг гешаси.

Лайли ва Мажнундай яшадик,
Ўттиздан ошиб, қирқ ёшгача
У деди бир куни: «Барибир,
Кўчанинг аёли бошқача.

Биттаси суйкалса «севдим» деб,
Биттаси май тутиб қўймайди,
Биттаси раққоса, силкиниб,
Мен учун арабча ўйнайди.

Қилган ҳар қилиғи ёқимли,
Чиқмай ҳам кўр тўғри йўлингдан.
Сен — яхши аёлсан, афсуски,
У ишлар келмайди қўлингдан».

Лол қолдим, шу менинг эримми?
Билмасдим қай дўстга сўзлашни,
Не дейсиз, ўттиз уч ёшимда,
Ўргандим арабча ўйнашни.

Ўзимни ҳар куйга солсам ҳам,
Эримнинг ҳеч кўнгли тўлмади.
Мен пир, деб сифинган одамни,
Ҳаромдан қайтариб бўлмади.

Билдимки, яшасанг тескари,
Нур соя кетидан чопаркан,
Эрим бир ит экан, ит зоти,
Боғда ҳам ахлатни топаркан».

Бу аёл бир таскин изларди,
Минг шукур, қалб қалбни танийди.
Шунча «касб» ўрганган аёлга,
Сабрни ўргатсам, қанийди.

Дедимки: — Никоҳ-ла эрингиз,
Сизга жон, жисми-ла боғланди,
Ака ё ука, ё отадай,
Кариндош, жигарга айланди.

Адашиб, бир гуноҳ қилганда,
Ким ота обрўсин тўкади?
Нуқсону айбини яширмай,
Қай сингил акани сўқади?

Биз — замин, эркаклар — дараҳтдир,
Дараҳтнинг дайдиси бўлмайди,
Шу шилқим шамоллар ёмон-да,
Тинчгина яашашга қўймайди.

Дараҳт-да, гоҳ тутиб шўхлиги,
Ҳар елни қучгиси келади,
Томири тупроқда бўлмаса,
Осмонга учгиси келади.

Гоҳ шамол увлаб дер: «Менингсан,
Заминдан суғуриб оламан»,
Дараҳт дер қайишиб: «Керакмас,
Қадрдон тупроқда қоламан».

Бу унга қисмат, гоҳ эгилиб,
Гоҳ синиб, зарбага тутилар,
Гоҳида қарсилаб йиқилиб,
Бу дайди шамолдан қутулар.

Арzonга тушмайди ҳар шамол,
Суяйсан ўзини тутгунча,
Эй, замин! Сен, шуни билгинки,
Шамоллар мавсуми ўткинчи.

Аёлнинг юzlари ёришди,
Айтдики: — Ечилди кўп тугун,
Дунёда шунча йил яшагач,
Эримни танидим шу бугун.

Тегишдим: — Эрингиз ит бўлса,
Вақтида овқатин есин-да,
Вақтида эркаланг, вақтида
Қўйворинг, бир «дайдиб» келсин-да.



«ДАФТАР»

Рўзғорда кўп гап ўтар,
Айттолмайсан барисин,
Илоҳо, эркак зоти,
Ҳалим бўлиб қарисин.

Ҳали ёшман дейди-ю,
Сал нарсага жаврайди,
Ўғиллар ишидан ҳам,
Бир камчилик ковладайди.

Мундоғроқ чиқиб қолса,
Келинлар қилган овқат,
Дер: «Шу уйда овқат еб,
Асло қилмадим роҳат».

Дазмол урмаган бўлсам,
Пайпогига бир бора,
Дейди: «Шундоқ яшадим,
Ўттиз йил мен бечора».

Тавба, қандай одам бу,
Ўз обрўсин тўқади,
Кечқурун ачом қилиб,
Кундуз куни сўқади.

Энди мендан кўради,
Тонса, кўзин «ўяман»,
Ҳар соҳага биттадан,
Дафтар тутиб қўяман.

Бу дафтарга ёзаман,
Йил, ой, соат, кунини,
Шундай қилиб бу эрнинг,
Ўчираман унини.

Ҳар хонага мих қоқиб,
Битта дафтар осаман,
У имзо чекади, мен,
Бармогимни босаман.

Хуллас, бошланди тартиб,
Сўкишлар ҳам тийилди,
Ҳар кунги тоза либос,
Имзо чекиб кийилди.

Ҳовли учун бир дафтар,
Қўл қўяр тозаликка,
Ҳаммом учун бир дафтар,
Шинам, озодаликка.

Ошхона дафтарига,
Имзо чекар «ширин» деб,
Гоҳо қўшиб қўяди,
«Раҳмат сизга, келин», деб.

Еб туриб ҳам маърайди,
Эрим қўйми, билмасам,
Тинчимасди қулоғим,
Бир ишниям қилмасам.

Кулсангиз ҳам айтайин,
Гап эшитиб тўйдим мен,
Ётоққаям бир катта,
Дафтар тутиб қўйдим мен.

Бу дафтарга ёзилар,
Қандай жойда ётгани,
Қандай «туш»лар кўргану,
Қандай тонглар отгани.

Эрталаб дедимки: — Бу,
Ётоқхона дафтари,
Ёзиб қўясиз бунга,
Тунда бўлган гапларни.

Эрим деди: — Ё, тавба!
Бўлдингми жинни-минни?
Мабодо келинларинг
Ўқиб-нетиб қолса-чи?

Дедим: — Тавба ҳар ишни,
Қингирига оласиз,
Ручкани бериб туринг,
Бундай қилиб ёсасиз.

У деди: — Энди тўхта,
Менга бергин ручкани,
Бу гапни сен бошладинг,
Мен қўяман точкани.

У ручкани олди-ю,
Бирпас бошин қашлади,
Мийигида бир кулиб,
Секин ёза бошлади:

— Чопа-чоплар тугади,
Кундуз тугаб, келди тун,
Ҳар бандага бу муддат,
Роҳат-фароғат учун.

Ётоқхонам сокин, тинч,
Ой мўралаб турибди,
Ёнгинамда бир парий,
Соч ўриб ўтирибди.

Эгнида ҳарир либос,
Кўринади бадани,
Жисмидан тараалган ис,
Маст қилади бандани.

Дедим: — Вой-вой, бас қилинг!
Ёзадиган гапми шу?
Деди: — Бу менинг гапим,
Хижолат бўлманг, сулув.

Эрим менга бир кулиб,
Қисиб кўйди кўзини,
Давом этди ёзишда,
Билганини ўзини:

— Тагимда оппоқ чойшаб,
Бошимда юмшоқ ёстиқ,
Аллоҳнинг жаннати ҳам.
Эмасдир бундан ортиқ.

Фақат меҳр изҳори.
Шивирлашлар сеҳрли,
Бу хонада «салом»дан
«Хайр»гача меҳрли.

Деворининг ҳар фишти,
Ҳар бурчаги гуллайди,
Бу хонанинг полидан,
Шифтигача куйлади.

Бу уйдаги ҳар туйғу,
Ҳар сўз тўғри, рост бўлар,
Бу уйга кирса ишқдан,
Микроблар ҳам маст бўлар.

Ўсиб шифтга интилар,
Гиламининг гули ҳам,
Чўғдай ёниб туради,
Ўчоғининг кули ҳам.

Бу хонанинг бир ўзи,
Рассом, шоир, бастакор,
Меҳмонхонанг, ошхонанг,
Шу хонага хизматкор.

Шу хона дафтарига,
Олсанг гар «икки» баҳо,
Бошқа дафтарларингни,
«Беш» қилолмайсан асло.

Доно бўлсанг, эй аёл!
Шу дафтарга «беш» ол-чи,
Бундан ташқаридаги,
Ҳамма гаплар бекорчи.

Дедим: — Уятсиз одам!
Сиз бешарм ёзувчи,
Бу дафтарни келинлар,
Қўриб-нетиб қолса-чи?..

Деди: — Бу дафтар ибрат,
Бўлсин келин, қизларга,
Ўқиган ҳарки одам,
Ҳавас қилсин бизларга.

Ҳамма ўзимизники,
Бунда душман, ғаним йўқ,
Билиб қўйгани яхши,
Шариатда шарм йўқ.

У сўнгги сўзни ёзиб,
Дафтарга қўйди баҳо,
Қўлимга бераётиб,
Тагига чекди имзо.

Қушдай сайраёттандим,
Ўйланиб қолдим бирдан,
Не бўлса ҳам шу одам,
Рози бўлсин-да мендан.

Илоҳий ҳикматларда
Ўқигандим ўзим ҳам:
«Чиқиши масин аёллар
Эрларининг сўзидан.

Эр тўшакка чақирса,
Келмаса хотин агар,
Лаънат айтиб туармиш,
Тамоми фаришталар».

Ўша кун келинларим,
Йиғилишганда илк бор,
Шеъримни ўқиб, дедим:
— Ҳушёр туринг, дафтар бор!

Эришайин десангиз,
Аллоҳнинг раҳматига,

Эринчоқлик қилманг ҳеч,
Эрингиз хизматига.

— Биз дафтар тутмаганмиз,
Дея, улар кулишди,
Дедим: «Бу дафтар нима?!
Ундан зўри турибди.

Иккита елкангизда,
Ўтириб фаришталар,
«Номай аъмол» дея,
Тўлдиришяпти дафтар.

Бу илоҳий саҳифа,
Сўнгги кунинг ёпилар,
Кейин ҳисобот учун,
Маҳшаргоҳда очилар.

Ўша кун у дафтарни,
Битта фаришта келиб,
Ўнг ё, чап ёнингиздан,
Узатади «ўқи» деб.

Истардим, не қилсак ҳам,
Иймонимиз эш бўлсин,
Фаришталар ёзётган,
Дафтаримиз «беш» бўлсин.

ОМОНАТ

Катта бозор олдида,
Уста Олим дўкони,
Қор, ёмғирдан паноҳдир,
Олдидаги айвони.

Баъзи бир бозорчилар,
Қилиб олишган одат,
Тугун, қоп, халтасини,
Қўйишади омонат.

Уста чархлайди пичок,
Ёнида бир ўғлони.
Гоҳида омонатга,
Тўлиб кетар айвони.

«Қайтаётиб оламиз,
Майлими, уста ака»?
Ўғлин ғаши келади:
«Йўл йўқ оёқ босишга».

Уста қулиб қўяди,
Нурга тўлади олам,
— Феълингизни кенг қилинг,
Савоб бўлади, болам.

Дунёвий ё ухравий,
Илми йўқ бу одамнинг,
Олим бўлса зиёга,
Тўлдиради оламни.

Ҳар тонг намоздан кейин,
Толиб билиб ўзини,
Ўқийди Куръон билан,
Ҳадиснинг мазмунини.

Доим мутолаадан,
Кўнгли нурга тўлади,
Ўйлайди: «Дунёда илм
Бўлмаса не бўларди?!»

Олим, таржимоннинг ҳам,
Йўқдир асло армони,
Буни бошлаган доно
Подишонинг фармони».

Яхшиликни ўргатар,
Бу китоблар ҳар маҳал,
Уста билар илмдан
Аввал туради амал.

Ўзининг билганича,
Ўқиб дуо қиласи,
Подишо-ю олимни
Кўшиб дуо қиласи.

Яшар доим бу одам,
Ажру савоб фикрида,
Икки қўли ишда-ю,
Тили Аллоҳ зикрида.

Бир кун унга қолдирди,
Янги қишлоқлик полвон,
Қора елим халтада,
Икки дона «бўлка» нон.

Бозор тугаб, кеч кирди,
Ҳали турибди нонлар,
Уста дер: «Нонин полвон,
Эртага келиб олар».

Эртасиям келмади
Омонат қўйган полвон,
Ё эсидан чиқди, ё,
Касал бўлди, иссиқ жон.

Қийин экан бироннинг,
Омонатин сақламоқ,
Топшириш керак қандоқ,
Олган бўлсанг, ўшандоқ.

Уста ташвишда: «Нонлар
Моғорлаб қотмасайди»,
Хотини ўйлар: «Нонни,
Кучоқлаб ётмасайди».

Эртаси ҳам келмади.
«Бўлка» нон қўйган полвон,
Ўзлари еб қўймаса,
Қотиб қолар энди нон.

Еб бўлмас ҳолга тушса,
Тутар мени уволи,
Яна бу нон — омонат,
Бир банданинг ҳалоли.

Эски нонни ейишиб,
Келиб қолса, деб, полвон,
Ҳар куни тонгда чиқиб,
Уста олди янги нон.

Беш кун, ўн кун, ўн беш кун,
Такрорланди шу ҳолат,
Бу уйда тандир нони,
Ейилар эди фақат.

— Бугун ҳам «бўлка» нонми?
Ўғлин битди тоқати,
— Сақлаш керак, ўғлоним,
Бироннинг омонати.

Омонат тартиби — шу
Эмас шунчаки эртак,
Қандай олинган бўлса,
Шундай қайтариш керак.

Гарчи соғинишганди,
Ҳаммаси тандир нонни,
Иссиғида ейилса,
Яйратар эди жонни.

Нон ичига хотини,
Соларди ёғу, жизза,
Оҳ-оҳ, пиёзли нонлар,
Пишганда бўлар мазза!

Уста дер: «омонатни,
Топширмагунимча то,
Нон ёпмай туинг, «бўлка»
Қолиб кетмасин, пошшо».

Кунлар ўтди-ю полвон,
Бир ойдаям келмади,
Шу вақтгача оила
Тандир нонин емади.

Бир куни уста олим,
Қарамай ҳеч қаёққа,
Янги «бўлка» нон олиб,
Кетди Янгиқишлоққа.

Суриштириб, қидириб,
Зўрға топди полвонни.
Ўша елим халтада
Топширди юмшоқ нонни.

Енгиллашиб, осмонга
Учиб қайтарди гўё,
Ўзга ҳақин емоқдан,
Ўзи асрасин Худо.

Полвон дер хотинига:
— Қара, кетмапти тафти,
Зўр нон олган эканман,
Бир ойда ҳам қотмапти.

Ишлар битсин, бозорга,
Яна тушиб қоламан,
Бир ой еймиз, шу нондан,
Ўнта-ўнта оламан.

Уста бу омонат деб,
Қанча куйдирганин жон,
Билмай ҳам қолди содда,
Янгиқишлоқлик полвон.



МУНДАРИЖА

Ватан ҳақида сўз	3
Катталарга насиҳат	6
Бироннинг боласи уйимда	10
Ўғил боланг – бироннинг хасми	13
Қизим, қайнонанг – тилло	16
Куёвимга илтижо	19
Муросасиз келинлардан дод!	22
«Асал ойи»	25
Кутуласан	29
Куда бўлдик	33
Сезгир она	36
Тасалли	38
«Тадбиркор» аёл	43
Навоийга қўшни бўлсам...	48
Яшашни ўргатаман	50
Ўзингизни эҳтиёт қилинг	54
«Ушабтуринг»	58
Замонавий эртак	62
Иккинчи китоб	66
Дўстимиз Иззатиллонинг пўстинига	69
Энг гўзал ҳадис	71
Йиртиқ камзул	75
Икки сандиқ «сеп»	79
Кумга қўмилган одам	85
Узатилаётган қизга ота дуоси	90
Жаннатдаги «куndoшим»	97
Гулдаста – 1	104
Гулдаста – 2	109
Эрим билан дам олдим	114
Ўйимдаги «шпион»	116
Гап	121
Онамни кўргани бораман	126

Келиним келин олди	129
«Хўп-хўп»	134
Кўрпача	138
Ношукур	142
Дам олгани бораман	144
Мен яшайман	151
Афлотуннинг «хотини»	154
Кўшнилар ҳақида ривоят	163
Дугоналар қиссаси	177
«Дарахтлар»	184
«Дафтар»	189
Омонат	198

Адабий-бадиий нашр

МАРҲАБО

Афғотуннинг хотини

Муҳаррир *Ж. Кароматов*

Мусаҳҳиҳ *М. Ишонхонова*

Мусаввир *Б. Зуфаров*

Техник муҳаррир *Л. Хижсова*

Саҳифаловчи *Л. Абкеримова*

Нашриёт лицензияси AI № 158, 14.08.2009.

Босишга 2015 йил 22 апрелда рухсат этилди.

Бичими 60×90¹/₂. Офсет қоғози.

«Таймс Тад» гарнитураси. Шартли босма табоби 6,5.

Нашр табоби 5,93. Адади 5000 нусха.

Буюртма № 15-358.

Ўзбекистон Матбуот ва ахборот агентлигининг

«O'zbekiston» нашриёт-матбаа ижодий уйи.

100129, Тошкент, Навоий кўчаси, 30.

e-mail: uzbekistan@iptd-uzbekistan.uz

www.iptd-uzbekistan.uz

Марҳабо.
М 29 Афлотуннинг хотин
Марҳабо. — Тошкент: «O'zbekiston» НМИУ,
2015. — 208 б.
ISBN 978-9943-28-307-7
УЎК: 821.512.133-1
КБК 84(5Ў)7